

O'ZBEKISTON YOZUVCHILAR  
UYUSHMASI

# RUSTAM MUSURMON

BOZBARAK

*She'rlar*

TOSHKENT  
«ADABIYOT»  
2021

Loyiha rahbari

**Sirojiddin SAYYID,**  
*O'zbekiston xalq shoiri*

Mas'ul muharrir

**G'ayrat MAJID,**  
*O'zbekiston Yozuvchilar uyushmasi a'zosi*

*Qo'lingizdagi ushbu mo'jaz to'plamda shoir va tarjimon O'zbekistonda xizmat ko'rsatgan madaniyat xodimi, Qoraqalpog'iston xalq shoiri Rustam Musurmonning turli yillarda yozilgan sara she'rlaridan tartib berildi.*

*So'zning rangini, ta'mini, haroratini nozik his etadigan toza qalbli shoirning navbatdagi she'riy guldastasi siz – she'riyat ixlosmandlariga manzur bo'ladi deb ishonamiz.*

ISBN 978-9943-6958-8-7

© R. Musurmon, 2021

© «Adabiyot», 2021

## USTOZ MEHRI

*Bugun tongda ustozim  
Abdulla Oripovni yana tushimda ko'rdim...*

Sizni tushlarimda ko'raman, ustoz,  
Ruhingiz bezovta bo'lmoqdami yo?  
Siz bilan gaplashib turaman, ustoz,  
Himmatingiz – dengiz, mehringiz – daryo.

Saharda tushimga kirmas behuda,  
Ustoz ota-onam kabi yagona.  
Ustozim, men Sizni sog'indim juda,  
Ustozim, ruhingiz menga parvona.

Yig'lab ko'zlarimni ochaman nogoh,  
Yuragimni kimga yoraman, ustoz?  
Sog'insam, borardim yoningizga goh,  
Endi Chig'atoyga boraman, ustoz...

Ayriliq dog'ini ko'rsatdi dunyo,  
Bugun mehringizga bo'lmoqdaman zor.  
Sizning ham tinchingiz buzmoqdami yo  
Bu dunyoda qolgan omonat diydor?!

Sizga tashlanmadi ne-ne dilozor,  
Hech qachon zulmatga qul bo'lmas quyosh.  
Balki ruhingizni qilmoqda bezor  
Ba'zi bir nokaslar otayotgan tosh?!

Yolg'onchi dunyoga kelmaysiz qaytib,  
Jannatga abadiy ko'chib o'tdingiz.  
Ona sayyoraga alvido aytib,  
Ummonlar ustidan uchib o'tdingiz.

Umringiz she'r edi, hayotingiz she'r,  
Xayolda yangi she'r to'qiyotirsiz.  
Nazm saroyida buyuk Alisher  
Navoiyga g'azal o'qiyotirsiz.

Qo'shiqlaringizga tabiat ham lol,  
Bulbuli edingiz go'zal bo'stonning.  
Siz butun jahonni etdingiz ishg'ol,  
Madhiyasini kuylab O'zbekistonning.

So'nggi nafasgacha qildingiz ijod,  
Navqiron yoshlarga matlabingiz yor.  
She'riyat qasrini etdingiz bunyod,  
Sizning adabiyot maktabingiz bor.

Yashayman ruhingiz ardog'i bilan,  
Issiq mehringizga zor bo'ldim, hayhot.  
Aziz ustozimning firog'i bilan  
Umrimga zulmini o'tkazar hayot.

Sizni tushlarimda ko'raman, ustoz!

## QUYOSH

*O'zbekiston Qahramoni ustoz  
Erkin Vohidovga  
Gyote "Faust" asarining  
o'zbekcha tarjimasini o'qib*

Shoir quyoshdan ham serhimmat,  
Qalamdan nur yog'ar ustma-ust.  
Tarjima ham ijod, ham san'at,  
Nashr etildi Toshkentda "Faust".

O'zbekchada o'qidim ravon,  
Shoh asardan terdim dur, gavhar.  
Ustoz – ulug' shoir, tarjimon  
Debochada so'z yozdi kamtar:

"Oy o'rtanar ko'zlarida yosh,  
Bag'ri dog'-u, yuragi qiyma.  
Der: "Ey falak, men edim quyosh,  
Nega meni qilding tarjima?!"

Oy tug'adi hilol – qalamqosh,  
Kun tug'adi payshanba, juma...  
Sharqdan chiqdi g'arbdagi quyosh  
Erkin Vohid qilgach tarjima.

## TOSHKENT KURANTLARI

Toshkent kurantlari – vaqtning ovozi,  
Har chorak soatda urib turar zang.  
Kunlarning cholg'usi, oylarning sozi,  
O'zgacha ohang bor, o'zgacha jarang.

Qum soat, suv soat, quyosh soat bor,  
Kun va oyga qarab vaqt o'lchar odam.  
Yo'ldan asrlarning karvoni o'tar,  
Yuk ortadi hayot qadamma-qadam.

Soat ishlashi shart aniq, bequsur,  
Zamondan orqada qolmaslik uchun.  
Ulug'bek rasadi, ziji emas sir,  
Bizga qarab soat to'g'rilar ochun.

Minorada turgan posbondir kurant,  
Vaqtida qo'ng'iroq chaladi hushyor.  
Toshkent kurantlari bo'ylari baland,  
Yulduzlarni sanab turadi bedor.

Xalq bilan hamnafas kechdi yillari,  
Qayg'u va shodlikni teng ko'rdi baham.  
To'xtab qolgan emish kurant millari  
Toshkentda zilzila boshlangan mahal.

Soat ham odamga o'xshab chekar g'am,  
Soat ham yig'laydi odamga o'xshab.

Soat ham odamdek tutadi motam,  
Odamning yonida turadi qaqshab.

Yurakda tulpordek dupurlar soat,  
Soatdek yugurar tomirlarda qon.  
Soat bu – tiriklik, soat bu – hayot,  
Soat bu – umrga sur'at bergan jon.

Ikkita yurakning muhabbati baxt,  
Toshkentning bog'ida qo'shaloq kurant  
Hamohang bong urar, yashnaydi poytaxt,  
Hayot baxsh etadi xush soat, xush vaqt.

Olamda vaqt erur eng oliy hakam,  
Yulduzlar taqdirni qilur bashorat.  
Kurant soatida o'n ikki raqam  
Abadiy hayotga erur ishorat.

Ikki kurant turar yonma-yon, xushbaxt,  
Zamin timsoli bu, osmon timsoli.  
Zamon o'taverar, o'taverar vaqt  
Ikki kurant aro daryo misoli.

## MAJNUNTOL

*Majnuntol tagiga o'tqazing meni,  
Men uchun yig'lasin, men yig'lab bo'ldim.*

**MIRTEMIR**

Kuyovlari o'lgan kelinchaklarning  
Daryoga bosh yuvib yig'lashi ayon.  
Tul qolgan majnuntol kuyinchaklaring  
Soyga chayqar sochin ko'zlari giryon.

Qabringizni o'pib yig'lar majnuntol:  
"Men uchun yig'lagan shoir, tura qol!"  
Sochlarini yulib yig'lar majnuntol:  
"Soyamda uxlagan shoir, tura qol!"

Turg'izmoqchi bo'lar bag'riga bosib  
Sizni shovullagan shoxlari bilan.  
Ezilgan o'pkasin ololmas bosib,  
Dunyoni to'ldirdi ohlari bilan.



## QASHQADARYO

Bir lahzangda to'rt fasl bordir alomat,  
Sehrlidir sening go'zal latofating.  
Cho'llaringda, tog'laringda ulug' ne'mat,  
Lol aylagay boyliging – gul nafasating,  
Qashqadaryo, Qashqadaryo!

Baxshilaring doston aytsa, dilga orom,  
Ado qilgay qirq kecha-yu kunduzlarni.  
Tomga chiqib, ushlab olsang bo'lar oqshom  
Charaqlagan katta-katta yulduzlarni,  
Qashqadaryo, Qashqadaryo!

Qadim Kesh-u Naxshab yovga aylab qahr,  
Ozodlik deb ko'targandi mash'al – yalov.  
Yer yuziga ulashmoqda otash mehr  
Bugun cho'llaringda yongan zangor olov,  
Qashqadaryo, Qashqadaryo!

Buyuk davlat qurding dunyoda mardona,  
Ot choptirib, surding davr-u davroningni.  
El-u yurtning qadri uchun tug'ding, Ona,  
Sohibqiron Amir Temur o'g'loningni,  
Qashqadaryo, Qashqadaryo!

Duo qilib ketgan ekan Sohobqiron,  
Xudo berdi yana o'zbek o'g'loniga.

Tulpor minib chiqdi yana bir pahlavon  
Mustaqillik uchun kurash maydoniga,  
Qashqadaryo, Qashqadaryo!

Ezgu niyat niholini ekdi o'lkam,  
Bog' yaraldi tog'larida, cho'llarida.  
Qator-qator daraxtlarning bo'yi ko'rkam  
Xonobod-u Qamashi – Chim yo'llarida,  
Qashqadaryo, Qashqadaryo!

Yo'lboshchiga uzangidosh bo'lgan elim,  
Xaloscorga jilovbardor bo'lgan elim,  
Ot yeldirib, yurtga yo'ldosh bo'lgan elim,  
Bayroq olib, yalovbardor bo'lgan elim –  
Qashqadaryo, Qashqadaryo!

## ORZULAR FAVVORASI

*Alisher Navoiy nomidagi  
Opera va balet teatri qoshidagi  
kuylovchi favvoraga*

Ushalsin orzularim,  
Bormi biron chorasi.  
Munavvar tuyg'ularim –  
Orzular favvorasi.

Sevar yorim quyoshdir,  
Men uning sayyorasi.  
Ko'zimdan chiqqan yoshdir,  
Orzular favvorasi.

Parilar surnay chalar,  
Yangraydi nog'orasi.  
Raqsga tushar, to'lg'onar  
Orzular favvorasi.

Suv yoqasinda jonim,  
Yuragimning porasi.  
Dil izhorim, zabonim –  
Orzular favvorasi.

Bunda Toshkent "Ushshog'"i,  
Xorazm "Suvora"si.  
Oshiqlarning mashshog'i –  
Orzular favvorasi.

## PAXTA GULI

Har kim sevsa o'z yurt-u o'z elini,  
Ikki qilmas dili bilan tilini.  
Bu dunyoda xushbo'y, rangdor gullar ko'p,  
Men sevaman oppoq paxta gulini.

Nomozshomgul kun botganda kuladi,  
Qizg'aldoqlar bahordayoq so'ladi.  
Qor ostidan qatrab chiqar boychechak,  
Paxta guli issiqqa o'ch bo'ladi.

Xalqni mehnat har tomonga yo'llaydi,  
Kim bog'laydi, kimlar dala-cho'llaydi.  
Paxta o'zbek kabi sevar quyoshni,  
Paxta yozning chillasida gullaydi.

Qadri bo'lak g'alla, boshoq, donani,  
Biroq paxta dehqon yori, jononi.  
Suvchi tunda egatlarga suv tarab,  
Kunduz sanar g'o'zadagi shonani.

Paxta guli dehqon yaktagidek oq,  
Paxta guli pushti yaproq, qiz yanoq.  
Paxtazorda porlagaydir yulduzlar,  
Paxta odam panjasidek besh chanoq.

Sevsang, paxta hosilini mo'l beradi,  
Qadoq qo'lingga momiq qo'l beradi.

Paxta xirmon yulduzlarga tegadi,  
Koinotga eltuvchi yo'l beradi.

Har timsolning o'z mazmuni, tili bor,  
Har elga xos ramzlarning har xili bor.  
Non-nasibam to'kin dasturxonimda  
Choynak-piyolamda paxta guli bor.

Dunyo chopon kiyar o'zbek qo'lidan,  
Boshda do'ppi, belbog'i bor belida.  
Deydi shoir: O'zbekcha so'zlar paxta,  
Yer yuzini sevar o'zbek tilida.

## SHO'ROBSOY

Qadrdonim, Sho'rob!  
Azizim, Sho'rob!  
Onasan beg'ubor bolaligimga.  
Loyqa suvlaringda yo'rgaklab, o'rab,  
Allalading..  
Shukur onaligingga!

Sho'rob, sen qadimiy Qashqadaryoga  
Tomiri tutashgan bitta irmoqsan.  
Sho'rob, sen Zarafshon, Ardvi Suraga  
Tus tug'ishgan singil, urug'-aymoqsan.

Pushti kamaringdir Zardushtiy Hisor,  
Muqaddas Gavadan boshlangan tog'lar.  
Dehqonlarga san'at o'rgatgan ilk bor,  
Dalalarga hayot bergan irmoqlar.

Sho'rob!  
Hushi uchib ketar kim jarga boqsa,  
Qirq yigit bo'yiday jarliklaring bor.  
Girdingda qo'rg'onlar paxsa va paxsa,  
O'tmishni ko'rsatib turguvchi devor.

Sangirtepa, Uzunqir – eng ko'hna shahar,  
Sho'robsoy suvidan qorilgan loyi.  
Ahamoniy shohlar ot surgan mahal  
Qaysar bobolarning jang qilgan joyi.

Yakkatutda quruq soylar bor, Sho'rob,  
 Bu soylarni tarix hikoya qilgan.  
 Qadimda suvlaring baqandek o'rab,  
 Qo'rg'onlarni yovdan himoya qilgan.

Qancha suvlar o'tdi,  
 Qancha xon o'tdi,  
 Qanchalab ko'priklar, to'g'onlar to'zdi.  
 Ko'mirtepa o'tdi, Pistaxon o'tdi,  
 Qancha qo'rg'onlarni buldozer buzdi.

Yer ostida qoldi gardga qorilib,  
 Ko'hna istehkomning jang shinaklari.  
 Sinib ketgan edi unga urilib,  
 Iskandarning metin manjaniqlari.

Dunyoni yutmoqchi bo'lgan arabning  
 Bo'g'zidan o'n to'rt yil tishlab turgan sher –  
 Muqanna, Muqanna ko'hna Sho'robning  
 Girdida ajdarni majaqlagan er...

Sho'rob!  
 Firibgar, oqqadar, nokaslar bisyor  
 Yurtparvar ko'rsatdi o'zni yolg'ondan.  
 O'shalar dastidan xor bo'ldi diyor,  
 O'shalar sog' chiqdi yongan qo'rg'ondan.

Sho'rob!  
 Xudo ayirmasin aslo imondan,  
 Qudratingni ko'rdim sel kelganida.

Qurbonlik tilading moldan va jondan  
Qirg'og'ingga dod deb el kelganida.

Jarlarning yuzida qushlar uyasi  
O'lik qatlamlarga baxsh etar hayot.  
Chumchuqlar Sho'robning bulbulgo'yosi,  
Kesakqoyalarda yangraydi bayot.

Uzun kokil tashlab jar bo'ksasidan,  
Nozlanib yotadi kovulpalaklar.  
Qirmizi kovullar – yor bo'sasidan  
Dudoqlari qonab ketgan malaklar.

Sho'rob,  
Qancha poda boqdim,  
Qancha mol boqdim,  
Chayla qurdim Podayotoqlaringda,  
Tandirdek osmonga quyoshni yopdim,  
Non botirib yedim buloqlaringda.

Qadrdonim, Sho'rob!  
Azizim, Sho'rob!  
Onasan beg'ubor bolaligimga.  
Loyqa suvlaringda yo'rgaklab, o'rab,  
Allalading...  
Shukur onaligingga!



## **BOBILQAND**

Bolaligim – yashin xotiram,  
Ko‘zim olov, nigohim chaqnoq.  
Tuyg‘ularim beg‘ubor osmon,  
Mangulik ongimda bir chaqmoq –  
Bobilqand.

Qandga tarix nomini bergan  
Mening ona xalqim donishmand.  
Labimda bir shirin so‘z bo‘lgan –  
Tilimda eriydi Bobilqand.

Bobildan ham ko‘hna diyorim,  
Yechilmoqda tarixdan tugun.  
Bobilqandning shirin ta‘mini  
Shuurimda shimiyman bugun.

Asli savdogarlar Kitobdan  
Holva eltgan Bobil ahliga.  
Qaytishida bolalariga  
Qand keltirgan Bobil shahridan.

## **BOZORTEPA**

Poda. Bozortepa mol boqar,  
Dashtni kesib yugurar Sho'rob.  
Yakkatut keng dalaga chopar,  
Charxarixni beliga o'rab.

Yassi yayloq. Issiq, jingirtob,  
Zorillaydi jizillovuqlar.  
Chanqab qolgan govmish – Sangirtog'  
Sho'rob suvlariga yovuqlar.

Bo'rttiradi qomatin tarang  
Shamol pirpiroqqa o'ralib.  
To'zon – raqsga tushadi satang  
Buralib, buralib, buralib...

Bozortepa o'ngirin qoqib,  
Podani haydaydi qishloqqa.  
Tun osmonda chiroqlar yoqib,  
Qorovullik qilar yayloqqa.

## YOZ

Qaldirg'och inidek mukammal supa,  
Shoxida bo'zto'rg'ay yayragan og'och.  
Boshiga chambarak toj kiygan tepa,  
Davlati ziyoda kumush qayrag'och.

Bag'rini tillarang bug'doyzor etib,  
Oltin o'roq bilan don o'rgan osmon.  
Ko'ksiga shamolning barmog'i tegib,  
Qiz kabi entikib titragan rayhon.

Momiq shu'lalarga g'arq bo'lgan ochun,  
Shivirlab yelkamga engashadi oy.  
Bir kecha yonimda tunamoq uchun  
Mening to'shagimdan oy so'raydi joy...

\* \* \*

Havodan olacha to'qiydi quyosh,  
Tomchilardan marjon yasaydi yomg'ir.  
Yuragini lola etar tog'-u tosh,  
Ko'pkari chopadi yer – qora bag'ir.

Bandidan uzilar uzum – oltin bosh,  
Ho'kizning shoxiga quyilar chog'ir.  
Bodomni abadiy sevar xarsang tosh,  
Ko'pkari chopadi yer – qora bag'ir.

Bog'lardan ketadi yashil tarovat,  
Sarg'ayib qoladi daraxtlar faqir.  
Cho'qqilar kuzatar tik, behalovat,  
Ko'pkari chopadi yer – qora bag'ir.

Sag'rinida hovur, ot kishnaydi. Qor...  
Yer yag'ir, yuk bilan yugurish og'ir.  
Tog'lar muzlab qolar kelguncha bahor,  
Ko'pkari chopadi yer – qora bag'ir.

## OSHI HALOL

Poda qaytdi,  
Qirda yonadi gulxan.  
Podachi gulxanga yotib biryonbosh  
Xurjundan chiqardi bitta ko'gannon –  
Ufqqa yonboshlab mudraydi quyosh..  
Oshi halol,  
Podachi,  
Oshi halol!

Sovliqlar sog'ildi,  
Qo'zilar yotdi.  
Eshiklarin yopdi qo'ra-yu qo'rg'on.  
Ovloq daralarning ko'zlari yondi –  
Tosho'choqda qaynar bir qora qumg'on.  
Oshi halol,  
Podachi,  
Oshi halol!

Rizq-u ro'z beradi buloq, tog'-u tosh,  
Odamning mol boqib topgan noni bol!  
Osmonda porlaydi yulduzlar bosh-bosh,  
Ko'kda poda boqib yuribdi hilol!  
Oshi halol,  
Podachi,  
Oshi halol!

## **POLVON**

Sher savlati yolida,  
Er davlati elida.  
Polvonlarning quvvati  
Bilagida, belida.

Chechan bo'lsa dovga qo'y,  
Mergan bo'lsa ovga qo'y.  
Yigitlarning sarasi  
Polvon bo'lsa yovga qo'y.

Qora tuya nor bo'lar,  
Qora buqa shor bo'lar.  
Olishmasa or uchun,  
Polvon zoti xor bo'lar.

Baland tog'dan qor ketmas,  
Burgut ketmas, sor ketmas.  
Polvonlarning ko'ksidan  
G'urur ketmas, or ketmas.

Siri chiqmas sirtiga,  
Sira qaytmas ortiga.  
Qo'rg'on bo'lar polvonlar  
Millatiga, yurtiga.

## **EL EGASI ER YIGIT**

El egasi er yigit,  
Er egasi sher yigit.  
Er qadrini el bilur  
Elim-yurtim der yigit.

Elning baxti erkakdir,  
Erkak elga tirgakdir.  
El-yurt uchun er yigit  
Kecha-kunduz sergakdir.

Yuragida yoli bor,  
Yurganda shamoli bor.  
Arslonim, deya suygan  
Yori bor, ayoli bor.

Nasl javhari erkak,  
Millat gavhari erkak.  
Zamona tinch, yurt obod,  
Hayot sarvari erkak.

## DA'VAT

Xuruj qildi dunyo ahliga ofat,  
Xalqni asrash zarur ko'rmay talofat,  
Yo'lboshchi shoshilinch ayladi da'vat:  
Elga ko'mak kerak, yurtga saxovat!

Lolalar so'lmasin desak tog'larda,  
Gulni do'l urmasin desak bog'larda,  
Odamlar yordamga muhtoj chog'larda  
Elga ko'mak kerak, yurtga saxovat.

Yaxshi noming bilan o'zgandir oting,  
Davlating ko'paysin, kelsin omading,  
Bir qo'ying o'n bo'lsin, yuzing bo'lsin ming,  
Elga ko'mak kerak, yurtga saxovat.

Bu xalq yaxshilikdan topgan saodat,  
Yordamga qo'l cho'zmoq oddiy bir odat,  
Og'ajon, ha degan tuyaga madad,  
Elga ko'mak kerak, yurtga saxovat.

Ko'rinmasdan hamla qilganida yov,  
Himoya kerakdir, kerak emas dov,  
Bu ham bir imtihon, bu ham bir sinov,  
Elga ko'mak kerak, yurtga saxovat.

Qancha sinovlarni baham ko'rgan teng,  
Biri yoqa bo'lgan, biri bo'lgan yeng,  
O'zbek mehri daryo, o'zbek bag'ri keng,  
Elga ko'mak kerak, yurtga saxovat.



## GO'ZAL DUNYO, TUZAL, DUNYO!

Buncha uzoq cho'zildi-ya darding, dunyo!  
Ko'zga surtay poyingdagi garding, dunyo!  
Odamlarning sog'lig'i deb kurashmoqda  
Qancha botirlaring, qancha marding, dunyo!

Go'zal dunyo, aylanayin, go'zal dunyo!  
Tuzal, dunyo! Tuzal, dunyo! Tuzal, dunyo!

Huvillaydi ko'chalaring, shaharlaring,  
Odamlarni qo'msar laylu nahorlaring.  
Eshigingga gul ko'tarib kelib, nahot,  
Hech kimsani ko'rmay ketar bahorlaring...

Tuzal, dunyo, bahor ketib, yozlar keldi,  
Turna qushlar, qaldirg'ochlar, g'ozlar keldi.  
Derazangda bulbul kuylar navo birlan,  
Yulduzlardan, quyoshlardan sozlar keldi.

Otday bo'lib chopib yursang bo'lmaydimi?  
Sog'liqdan baxt topib yursang bo'lmaydimi?  
Boshing bog'lab, uydan chiqmay yotib qolsang,  
Senga o'zga sayyoralar kulmaydimi?

Jonim og'rir tikan kirsa barmog'ingga,  
Boylklarni alishmayman tirnog'ingga.  
Pul topay deb halak bo'lma, qog'oz pullar  
Arzimaydi sog'-salomat yurmog'ingga.

Yomg'irlarni, bo'ronlarni to'xtatgan so'z,  
Yashinlarni, to'fonlarni to'xtatgan so'z.  
Shoir agar ko'kka qarab nido qilsa,  
Balolarni, suronlarni to'xtatgan so'z.

Xudoyimga yurak bilan qildim niyat,  
Yetar endi bu bemorlik, bu jarohat!  
Tavba qildim, nola qildim, nido qildim:  
To'xta, balo! To'xta, kulfat! To'xta, ofat!

Go'zal dunyo, aylanayin, go'zal dunyo!  
Tuzal, dunyo! Tuzal, dunyo! Tuzal, dunyo!

## XABAR

*Ustoz Ahmadjon Meliboyevga*

Buyuk onnga qaram erur koinot,  
Axborot o'qida aylanar olam.  
Bamisli yashindek chaqnar matbuot,  
Dunyo yuragini eshitar odam.

Qadimda ot minib yugurgan chopar,  
Goh noma keltirgan, goh noma eltgan.  
Yetkazmoqchi bo'lsa shoshilinch xabar,  
Baland qo'rg'on uzra tutatgan gulxan.

Balodan bexabar qolib banogoh,  
Kunpayakun bo'lgan necha el, eh-hey...  
Vaqtida vulqondan bo'lmadi ogoh,  
Tiriklay lavaga ko'mildi Pompey.

Pompey-ku taqdirning hukmi-da, mayli...  
Dunyodan bexabar qolmoqlik yomon.  
Dunyodan bexabar inson tufayli  
Dunyoning o'zi ham qolmaydi omon.

Gar odam odamdan olmasa xabar,  
Gar odam odamga bermasa xabar,  
Dunyo bo'lmas edi buncha mo'tabar,  
Hayot bo'lmas edi buncha dilobar.

Qo'l keldi radio, oynayi jahon,  
Tezlikda tovushdan ham o'zib ketdik.  
Dunyoga matbuot bo'ldi hukmron,  
Nihoyat axborot asriga yetdik.

Oynayi jahondek yorishdi ochun,  
Ekkranga boqadi inson sertashvish.  
Quyosh chiqishidan boshlangandek kun,  
Gazeta o'qishdan boshlanadi ish.

Mehribon bo'lmaydi hamisha taqdir,  
Balki qilib bo'lmas hayotni tahrir.  
Rahmat, yaxshi xabar aytguvchi Muxbir!  
Rahmat, ahvolimdan voqif Muharrir.

**MUXBIR**

Katta gazetada kichik muxbirman,  
Hayotdan izlayman mavzu, maqola.  
Qog'oz-qalam bilan tutash taqdirman,  
Yozganlarim el-u yurtga havola.

Ko'ngil sog'ingani kabi bahorni,  
Gavhar yarashgandek uzuk ko'ziga.  
Fikr yangi bo'lsa, tashbeh ohorli,  
Quloq soladi el muxbir so'ziga.

O'quvchilar fikri asosiy mezon,  
Baholar nimaga qodirligingni.  
Dunyoga so'z aytish emasdir oson,  
Ijodda isbotla botirligingni.

Sahifalar yuzdir, sarlavhalar qosh,  
Oydek gazetaning bo'lay adosi.  
Tishga botganidek oshdan chiqqan tosh,  
So'zda o'tib ketsa imlo xatosi.

Tekshirib har bitta sahifasini,  
Boqib xabarlarga, bosh maqolaga...  
Bejirim gazeta loyihasini  
Nihoyat eltaman bosmaxonaga.

Go'yo oshiq yigit oqshom beqaror  
Kutgandek sevimli qizni intizor –

Tun bo‘yi navbatchi bo‘lib vafodor,  
Gazeta diydorin poylayman bedor.

Yangi gazetadan anqiydi bo‘yoq,  
“Nashrga ijozat!” chekaman imzo.  
Ko‘chaga chiqaman, jim-jit hammayoq,  
Tong otar, hademay qatnaydi metro.

Gazeta tandirdan uzilgan nondek,  
Axborot asrida totli nonushta.  
Ma’naviy ozuqa tomirda qondek,  
Yurak toza bo‘lar, ko‘ngil sarishta.

Uyga qaytganimda yurakni g‘ashlab:  
“Tunda kelmadingiz...” – deydi ayolim.  
Sovugan ovqatni yeyman yonboshlab,  
Gazetaga ketar yana xayolim.

Hayotim bog‘langan tahririyatga,  
Meni qalam bilan siylagan taqdir.  
Haqiqat, adolat, ezgu niyatga  
Mas‘ul muxbirdirman, javobgar muxbir.

## NURLI QALAM

Nurli qalam, nurli qalam,  
Sen bilan nurafshon olam.  
Jurnalda bosilgan she'rim,  
Gazetda chiqqan maqolam.

Nurli qalam, nurli qalam,  
Qog'oz – ekinzorim, dalam.  
Yozib-chizib ter to'kaman,  
Gazetalar g'aram-g'aram.

Nurli qalam, nurli qalam,  
Dunyo bir kam – bitmas chalam.  
“Osmon uzoq, yer qattiq”dir,  
Yangilandi yana yaram.

Nurli qalam, nurli qalam,  
Yozganlarim – mening bolam.  
Yig'lamasin, o'ksinmasin,  
Tor bo'lmasin unga olam.

Nurli qalam, nurli qalam,  
Dilda nolam, ko'zda jolam.  
Dunyoni yeb bitiradi  
Bir kun nafsi buzuq odam.

Nurli qalam, nurli qalam,  
Kecha menga berdi otam.  
Armonim yo‘q, qo‘llarimdan  
Erta seni olur bo‘tam.

Nurli qalam, nurli qalam,  
Shon-shuhrat – bevafo sanam.  
Qattiq sevsam nima qilay  
Shu ayolni jonimdanam!

Nurli qalam, nurli qalam.



## AQCHAKO'L

*Ellikqal'a tumani "Aqchako'l ilhomlari"  
yosh ijodkorlar Respublika seminari  
taassurotlari*

Otang Ukuzdaryo, yoshulling Orol,  
Ulug'san, qutlug'san, mo'lsan, Aqchako'l.  
Sohiling orombaxsh, suvlaring zilol,  
Bo'stonga yarashgan gulsan, Aqchako'l.

To'lqinlar torini chertadi shamol,  
Qizdek sollanadi suluv Turong'il.  
Kechalar bo'yningga osilar hilol,  
Labinnga dudog'in tutadi Xongul.

Tingladim, to'lqinlar kuylagan qo'shiq –  
To'rtko'lda sayragan bulbul navosi:  
Yangrar Ellikqal'a, Bo'stonga oshiq  
Otajon hofizning sohir ovozi...

Sevgim degich kabi aslo dam bermas,  
Qalbim qirg'oqlari bormoqda nurab.  
Amu toshqinidek jo'shar "Dambermas",  
Ohim yuksaladi osmonga qarab.

To'qayga qirg'ovul, suvga shag'ala,  
Qoraqalpoqqa sen yorsan, Aqchako'l.  
She'rim qanot qoqar seni yoqalab,  
Qo'limda sehrlil torsan, Aqchako'l.

## MURODBOY OG'AGA

Kalom bilan yashaysiz, ajoyibsiz,  
Nashriyotning oyligiga, Murodboy.  
O'tkir qalamingiz bilan sohibsiz  
Prozaning biyligiga, Murodboy.

Abdulla Orif aytgan – munosibsiz  
Siz Nobelning siylig'iga, Murodboy.  
Nodir asarlaringizni sotmayman  
Yetti iqlim boyligiga, Murodboy.

Oddiy xalqning arz-dodisiz, Murodboy,  
Siz Berdaqning zuryodisiz, Murodboy.  
Qahramonlaringiz sodda, oqko'ngil,  
Qoraqalpoq murodisiz, Murodboy.

Ot choptirib elga chiqqan dong'ingiz,  
Doim olg'a bosar mashhur "Tank"ingiz.  
Siz nashr etgan kitoblar – asil boylik –  
Pulga to'lib ketgan Sizning bankingiz.

Bir yon Chimboy, bir yoningiz Kegayli,  
Yigitlari Majnun, qizlari Layli.  
Dunyo sevib qolar qoraqalpoqni,  
Nizanovning asarlari tufayli.

Turkiy ellar Sizga qondosh, og'a-ini,  
Ustoz deb bildingiz Nosir og'ayni.  
Omon bo'ling adabiyot baxtiga,  
Uzoq yashang, M. Nizanov og'ayni.

**AYOL**

Vujuding quyoshdan yaralgan nursan,  
Arshdan uchib tushgan pari paykarsan.  
Muqaddas tuproqda tug'ilgan hursan,  
Jayhun jilolagan dursan, gavharsan.

Mehribon quyoshdek muqaddas oting,  
Ezgu so'z, ezgu ish va ezgu xayol.  
Tug'ishgan urug'ing, qarindosh zoting  
Zardusht beshigini tebratgan ayol.

Otashsan, tandirga bug'doy non yopib,  
O'choqda olovni asragan zotsan.  
Amazonkadirsan, asov ot chopib,  
Yoy tortgan dovyurak hursan, ozodsan.

Yuragimda sevgi – beg'ubor tuyg'u,  
Oydek bokirasan, yulduzdek suluv.  
Xayol dengizida po'rtana, g'ulu,  
Sohilda yuzasan misoli oq quv.

Amuga tutashgan edi o'zanim,  
Sahrodagi qumlar to'sdi ko'zimni.  
Sevging ko'zlarimni ochdi, go'zalim,  
Amu, oyog'ingga uray o'zimni.

## **TURONG'IL VA SHAMOL**

Turong'il bo'yidek qomating nozik,  
Turong'il bargidek sochlaring nafis.  
Shamoldek yelaman aqldan ozib,  
Husningni shamoldek etajakman his.

Shamoldek chiqaman doim yo'lingdan,  
Turong'il, chopaman vaslingga shoshib.  
Shamoldek tortaman ushlab qo'lingdan,  
Turong'il, ketasan menga ergashib.

## KEMA

Yurak – kema,  
Orolda qumlarga botib qolgan.  
Anchadan buyon kelmas  
Katta daryolardan suv.  
Jayhun bilan Sayxunga  
Cho'lda termulib tolgan,  
Tashlab ketgan baliqlar,  
Chag'alay, o'rdak, oqqu...

Yurak – kema,  
Sahroda qumlarga langar solgan.  
Dengizda yayrab suzmas,  
To'lqinlarga urmas to'sh.  
Sochi shamolda o'ynab  
Uzoq qo'l siltab qolgan  
Sohildagi go'zalni  
Sog'inib ko'radi tush.

## **JONIM BOLAM**

Bog'imdagi gulim deydi, lolam deydi,  
Qizalog'in erkalatib onam deydi,  
O'g'ilchasin g'ururlanib otam deydi,  
O'zbek faqat bolam deydi, bolam deydi.

Tinglang ona dardin, ayol qo'shig'ini,  
Alla aytib tebratadi beshigini,  
Kelajakka ochar hayot eshigini,  
O'zbek faqat bolam deydi, bolam deydi.

Onadan or etganni kim odam deydi,  
Bolani xor etganni kim odam deydi,  
Mehrga zor etganni kim odam deydi,  
O'zbek faqat bolam deydi, bolam deydi.

Esli-hushli bolam, mo'min-qobil bolam,  
Iste'dodli bolam, ilmi komil bolam,  
Polvon bolam, el yukiga homil bolam,  
O'zbek faqat bolam deydi, bolam deydi.

Ota-onang payvandisan, jonim bolam,  
Pahlavon el farzandisan, jonim bolam,  
Qudratli yurt dilbandisan, jonim bolam,  
O'zbek faqat bolam deydi, bolam deydi.

## VARRAK

### *Bolalarimga*

Ko'm-ko'k osmondagi ko'm-ko'k yaylovda  
Dik-dik chopayotgan oppoq toychog'im,  
Tuyog'idan yulduz chaqnaydigan ot,  
Dimog'idan bulut purkaydigan ot.

Ko'm-ko'k yaylovdagi oppoq osmonga  
Uchib borayotgan oppoq toychog'im,  
Kokilingga qizlar qaraydi kuyib,  
Yollaringni shamol taraydi suyub.

Ko'm-ko'k yaylovdagi oppoq toychog'im,  
Singib bormoqdaman ko'm-ko'k osmonga.  
Arqoningni uzun tashlayman o'zim,  
Jilovingni torta boshlayman o'zim.

Ko'm-ko'k osmondagi ko'm-ko'k yaylovda  
Dik-dik chopayotgan oppoq toychog'im,  
Tuyog'idan yulduz chaqnaydigan ot,  
Dimog'idan bulut purkaydigan ot.

## O'G'IL SUYISH

*O'g'lim Husanjonga*

Bir, ikki..., beshoyoqq,  
O'rmalaydi beshoyoqq,  
To'rtoyoqqa eshoyoqq,  
Beshoyoqda peshoyoqq...  
Ha, toy-toy!  
Ha, toy-toy!  
– Cho'lpp...  
– Ah, cho'chchog'idan!

Tomir-u qonim – yuruvv-chi,  
Suyagimdi suruvv-chi.  
Minora – gumbaz-gumbaz  
Imooratlar quruvv-chi.  
Ha, toy-toy!  
Ha, toy-toy!  
– Cho'lpp...  
– Ah, cho'chchog'idan!

Bir, ikki, uchoo-g'i,  
O'g'ilchamning cho'choo-g'i.  
Bo'liq bo'lsin, mo'l bo'lsin  
Arpa-bug'doy boshoo-g'i.  
Ha, toy-toy!  
Ha, toy-toy!  
– Cho'lpp...  
– Ah, cho'chchog'idan!

*1990-yil*



## IZLA MENI

*Muhammad Xo'shondan*

Sen deganda bobongning yo'q to'yimi,  
Kel, o'ynaylik  
Bekinmachoq o'yinin.

“Avvalaman” so'zin ulgi etaman,  
Sen qolasan,  
Men yashirinib ketaman.

O'yin sharti qattiq, bilmas “obbo”ngni,  
Sen topib ol,  
Izlab o'rgan bobongni.

Izla meni yaqin yerdan, olisdan,  
Topolmasang,  
“Qaydasiz?!” deb tovushla.

Kelishaylik, shunday mening talabim,  
Meni topsang,  
Meniki bu g'alabam.

## SO'NGGI QO'NG'IROQ

*Bitiruvchilar tilidan*

Ustozlar mehridan bahramand bo'lib,  
O'qidik, maktabda tugadi saboq.  
Yangraysan xayrlashuv vaqtin bildirib,  
So'nggi qo'ng'iroq!  
So'nggi qo'ng'iroq!

Darsning boshlanishi, darsning yakuni  
Vaqtida necha bor kuy chalding yangroq.  
Nahot, yetib keldi ayriliq kuni,  
So'nggi qo'ng'iroq!  
So'nggi qo'ng'iroq!

Naqadar qadrdon bizga ovozing,  
Naqadar o'rganib qolgandir quloq.  
Maktab musiqasi, tengi yo'q sozing,  
So'nggi qo'ng'iroq!  
So'nggi qo'ng'iroq!

Baxt yo'lin izlashga chorlaydi hayot,  
Samoda yulduzsan, ummonda mayoq.  
Orzu osmonida tolmagay qanot,  
So'nggi qo'ng'iroq!  
So'nggi qo'ng'iroq!

Endi sen hayotning imtihonida  
Ustoz savolidek berasan so'roq.  
Yangrab tur umrning har bir onida,  
So'nggi qo'ng'iroq!  
So'nggi qo'ng'iroq!

Ona maktab, sening oshiyoningdan  
Qushlar kabi uchib ketamiz yiroq.  
Sayraysan qaqnusdek kechib joningdan,  
So'nggi qo'ng'iroq!  
So'nggi qo'ng'iroq!

*25. 05. 2021.*

## YURAK

Yurak – mening duldulim,  
Ko'kragimda qozig'i.  
Beda emas, yem emas,  
Mehrdandir ozig'i.

Pishqiradi depsinib,  
Qon quyilar ko'ziga.  
Mendan boshqa odamning  
Ko'rinmaydi ko'ziga.

O'zim bersam, yemaydi,  
Yemishlarning gulidan.  
Oziqlanib o'rgangan  
Suluvlarning qo'lidan.

Ko'zlar oy-u yulduzni  
Arg'amchining dastidan.  
Ko'pchib ketdi ko'kragim  
Tuyoqlari ostida.

Oxiri bir parini  
Olib qochar yugurib.  
Meni sudrab ketadi,  
Qozig'ini sug'urib...

## MUHABBAT

Bilmayman sariqmi, qorami,  
Aniqlab bo'lmaydi elini.  
Yuragi qo'shaloq bo'ladi,  
Oshiqlar tushunar tilini.

Tentirar keng ko'cha-ko'ylarda,  
Baribir hech qayga sig'maydi.  
Gohida tushib ne ko'ylarga  
Yig'laydi, yig'laydi, yig'laydi.

Ko'zidan ketadi madori,  
Qo'rqasan yuziga qarashga.  
Ko'rmadim uningday gadoni,  
Or qilar sadaqa so'rashga.

\* \* \*

Ko'kraginga mushtlaydi birov,  
Mushtlayverar ichkarisidan:  
– Nima bo'ldi, ochingizlar-ov,  
Bu vujudning tashqarisida?!

Haqiqatni aytaman og'ir,  
Og'ir mushtlar tushar siynamga.  
O'zimdanda ham qiyinroq, axir,  
Ichimdagi jabrdiydaga.

– Bandim, meni mushtlayver, yig'lab,  
Qattiqroq chek afsus, nadomat.  
Xuddi sendek birovni bog'lab,  
Olib ketdi bir sarviqomat...

## DARVISH

Dedi: “Gar kashkulingda  
Dinor yo‘qdir, qalandar,  
Quvonursan, kulursan –  
Ko‘ngling to‘qdir, qalandar?!”

Dedimki: “Bexabarsan,  
Kashkulimga, jonona,  
Ul ikki ko‘z – qo‘sh dinor  
Tashlab o‘tdi pinhona”.

Dediki: “Gar boshingda  
Panoh yo‘qdur, qalandar,  
Quvonursan, kulursan –  
Ko‘ngling to‘qdir, qalandar?!”

Dedim: “Shukur, mening ham  
Panohim bor, jonona –  
Muhabbat bor boshimda,  
Ilohim bor, jonona”.

Dedi: “Qayga ketursan?”  
Dedim: “Yorga yeturman”.

\* \* \*

Yolg'iz senga aytmoq bo'lgan gaplarim  
Qo'shiq bo'lib "Bahor vals" da yangrar.  
Yurakda limmo-lim to'lgan dardlarim  
Gulparast bulbulning bo'g'zida ingrar.

Sargardon gadodek qo'llarin cho'zib,  
Muhabbatim sendan tilar sadaqa –  
Uning nigohidan ko'zlaring uzib,  
Mehrning xazinasidan bermaysan chaqa.

Xanjar sanchib asov yurakkinamga,  
Bo'yashga rang olding tirnoqlar uchun.  
Xudo seni olov quchoqqinamga  
Surgun qilsin o'sha gunohlar uchun.



## YOR KELAR YO'LGA QARAB

Jonim, ishq faslida gull ekdingizmu?  
Bepoyon ko'nglimga mo'll ekdingizmu?  
Visolim hosilin terolmasin deb,  
Ko'zimga mevasiz yo'll ekdingizmu?!  
– O'tti, o'tti, o'tti-yovv...  
Hamma o'tib ketti-yovv...  
Ul sarvinoo-oz o'tt-ma-di-uvv...

Shoxlari har yoqqa shoxchalaydi-ey,  
Har shoxda bir bulbul "chah-chah"laydi-yey.  
Ko'nglimda ochilgan gul-u g'unchalar  
Samandarqushlarni "gah-gah"laydi-yey:  
– O'tti, o'tti, o'tti-yovv...  
Hamma o'tib ketti-yovv...  
Ul sarvinoo-oz o'tt-ma-di-uvv...

Bu og'ochch aqlimga, so'roo-oqq sooladi:  
"Nechunn...  
Menga nuqull firoo-oqq sooladi?  
Sizga...  
Ezilgandan shirasi chiqibb,  
Chak-chakk tomayotgan yuraa-akk sooladi?"  
– O'tti, o'tti, o'tti-yovv...  
Hamma o'tib ketti-yovv...  
Ul sarvinoo-oz o'tt-ma-di-uvv...  
Ildiz otayotir bag'irlarimga,

Ishqq,  
Ishqq oqayotir tomirlarimda.  
Nahotki, siz uning novdalarini  
Payvandlab qo'yingiz tomirlaringa?!  
– O'tti, o'tti, o'tti-yovv...  
Hamma o'tib ketti-yovv...  
Ul sarvinoo-oz o'tt-ma-di-uvv...

Jonim, ishq faslida gull ekdingizmu?  
Bepoyon ko'nglimga mo'll ekdingizmu?  
Visolim hosilin terolmasin deb,  
Ko'zimga mevasiz yo'll ekdingizmu?!

### **IZTIROB**

Bilmadim, irodang toshmi-temirmi,  
Nechun diydalaring bunchalar qattiq?  
Hayot daraxtidan terib yedirdim  
Senga mevalarni achchiqdan-achchiq:  
– Navqiron, navqiron, sen orqada qol,  
Bu mening sevgilim – oltmish yashar chol!

Qismat umidlarga qabrlar qazar,  
Qayrab kelyapman qilichlarimni.  
Tayyorlan galdagi zarbaga, hozir  
Uzib yuboraman ilinjlarini:  
– Navqiron, navqiron, sen orqada qol,  
Bu mening sevgilim – oltmish yashar chol!

Tilimga chiqarsam dilimdagini,  
Navqiron yigitsan jonimga yoqar.  
Dilimga yashirsam tilimdagini,  
Zamon senga emas, cholimga boqar:  
– Navqiron, navqiron, sen orqada qol,  
Bu mening sevgilim – oltmish yashar chol!

Ko'zlarim kulsa-da, dilda alam bor,  
Chilparchin qilgudek butun olamni.  
Ichimga sharillab yog'ar jolam bor,  
Otasi tirikdir sag'ir bolamning:  
– Navqiron, navqiron, sen orqada qol,  
Bu mening sevgilim – oltmish yashar chol!

Ilojim qolmadi... Yigitsan, meni  
Bu yo'ldan qaytargin, qo'lingdan kelsa.  
Yolg'on so'zlab aldab yuribman seni,  
Gapimga ishonma hali ham bo'lsa:  
– Navqiron, navqiron, sen orqada qol,  
Bu mening sevgilim – oltmish yashar chol!

\* \* \*

Yiqildim, ko'makka keldi faqat it,  
Yo'llar oyog'imga bosh urishdilar –  
Izladim, chaqirdim, ko'chalar jimjit,  
Ular izingizni yashirishdilar.  
Gulim, sizni yo'llar qizg'anadi mendan.

Yillar mening umrim taqvimlaridan  
Qizil kunlarini o'chirishdilar.  
Faqat chehrangizni ko'zimdan olib,  
Yuragimga o'y-yib ko'chirishdilar.  
Gulim, sizni yo'llar qizg'anadi mendan.

Bedor kezzanimda har tong, har sahar,  
Meni tushlarida ko'rganmish gullar.  
Yig'lab uyg'ondilar, lekin har safar,  
Eh-h, meni tushida ko'rganmish gullar!

*1989-yil*

## RUHIMNING DOVUSHI

*Ustoz Ikrom OTAMURODga*

Toki nafas olmoqda cholg'u,  
Hayotining shartidir navo.  
Kuy barhayot, musiqa mangu,  
Men – nay nafas olayotgan havo:

- I – fu – u – uvv...
- I – fu – u – uvv...
- I – fu – u – uvv...

Tong' o'lg'unchah men ki bulbulning  
Tomog'idan chiqayotgan jon.  
So'ng gulg'unchah ham qizil gulning  
Qulog'idan kirayotgan jon:

- I – fu – u – uvv...
- I – fu – u – uvv...
- I – fu – u – uvv...

Tor tortilgan torning qornida  
Yuragimning pardasidir u.  
Bir dunyoning ikki yarmiga  
Teng bo'linib aytadi turku:

- I – fu – u – uvv...
- I – fu – u – uvv...
- I – fu – u – uvv...

Cholg'uvchinning barmoqlarida  
Duppurlaydi yurak – choldirma.

Qasnog'ining qirg'oqlarida  
Shaqqirlaydi zirak – zanjirlar:

– I – fu – u – uvv...

– I – fu – u – uvv...

– I – fu – u – uvv...

Toki nafas olmoqda cholg'u,

Hayotining shartidir navo.

Kuy barhayot, musiqa mangu,

Men – nay nafas olayotgan havo:

– I – fu – u – uvv...

– I – fu – u – uvv...

– I – fu – u – uvv...

## MUHABBAT

Muhabbat shunchalik mittiki,  
Bemalol sig'adi yurakka.  
Muhabbat shunchalik kattaki,  
Sig'maydi na yer-u falakka.

Yo'l to'sar. Qizlarda bosh qotar –  
Bilakka chang solar, bilakka.  
Ko'z otar, qosh otar, tosh otar,  
Yurakka tegadi, yurakka.

Berkinar, hech kimga bildirmay  
Uzoqdan kuzatib turadi.  
Yo'llarni bir nafas tindirmay  
Tun-u kun uxlamay yuradi.

O'zingni aldamay qo'yaqol,  
Ne darkor o'yinchi – ovunchi?  
Sen meni shoshilib suyaqol,  
Jonimdan berayin suyunchi.

Bilib qo'y, mehrni qantarib  
Yashasang ko'kaying kuyadi.  
Meni-chi, muhabbat qaytarib  
Qo'yniga yashirib qo'yadi.

## SEVAMAN

Sevaman –

Aslo yeb to‘ymaydi tilim  
So‘zimning eng shirin sochqilarini.

Sevaman –

Aslo tinch qo‘ymaydi dilim  
Ko‘zimning eng uzun soqchilarini.

Sevaman –

Ko‘zlarim bo‘lishib ogoh  
Amr-u farmon berdi sipohlariga.

Sevaman –

“Elchiga o‘lim yo‘q”, nogoh  
Ishqnoma tutqazdim nigohlarimga.

Sevaman –

Xushxabar  
Yo‘lladim alhol  
Muhabbat mulkiga dilchilarimni.

Malikam, kishanlab berdingiz darhol  
Jallodlar ilkiga elchilarimni...



## SOVCHI

*“La-lay, La-lay-chi keldi,  
Ko‘chaga moychi keldi.  
Ko‘chaga moyini tashlab,  
Sanamga sovchi keldi...”  
Xalq qo‘shig‘i*

Ukajonim, rostdan sovchi keldimi?  
Oqqushimga biror ovchi keldimi?  
To‘qqiz toboq, to‘qqiz tugun ko‘tarib,  
Ko‘chamizga to‘y-to‘ylovchi keldimi?

La-lay-chilar qaboq uyib ketsin-ey,  
O‘z yog‘ida o‘zi kuyib ketsin-ey!  
Shum sovchilar Sanamjonga kelguncha,  
Mening ikki ko‘zim o‘yib ketsin-ey!

Bo‘sag‘ada yetdi bo‘ying, Sanamjon,  
Endi bo‘lar sening to‘ying, Sanamjon.  
Bo‘sag‘angdan bo‘ylab qo‘shiq aytasan,  
Munojotga o‘xshar kuying, Sanamjon.

“Bo‘sa-g‘a-gaa yetti bo‘-yii-im, yor, or,  
Qachon bo‘-lar mening to‘-yii-im, yor, or?  
Bo‘saa-g‘amm-dan, yor-ey, bo‘y-laa-ma-sangiz,  
Kuyii-ib ketsin mening uyi-im, yor... or...”

Libosingni zar bezaklar bezaydi,  
Boshginangni zar chechaklar bezaydi –  
Kundan kunga sarg'aytirib, so'ldirib,  
Gulginamni zarpechaklar bezaydi.

Kokillaring tolim-tolim, Sanamjon,  
Otang senga buncha zolim, Sanamjon.  
Yor-yor emas, zor-zor aytib yig'layman,  
Nelar kechar sensiz holim, Sanamjon?!

La-lay-chilar qaboq uyib ketsin-ey,  
O'z yog'ida o'zi kuyib ketsin-ey!  
Shum sovchilar Sanamjonga kelguncha,  
Mening ikki ko'zim o'yib ketsin-ey!

La-lay, La- lay-chi kee-el-dii-i...  
Ko'-cha-ga moy-chi kee-el-dii-i...  
Ko'-cha-ga moyii-ni tash-laa-ab  
Sanamga sov-chi kee-el-dii-i...

## SOG'INCH VA QULFLOG'LIQ ESHIK

Boshim ko'kka yetganda  
Qanotiga kishan urilgan qushim,  
Diydor shamollarida  
Havolanib uchmaysan?!

Og'zim oshga yetganda  
Tumshug'iga qulf osilgan qushim,  
Qo'limdan don yemaysan?!  
Kaftimdan suv ichmaysan?!

Bo'sag'amga yetganda  
Tomog'iga zanjir osilgan qushim,  
Chorlab sayramaysan?!  
Tovushtirmaysan?!

U yog'ingdan uni,  
Bu yog'ingdan meni  
Oshiq-ma'shug'ingday  
Qovushtirmaysan?!

- Qushim!  
- To'q-to'q...  
- Qushim!  
- Yo'q-yo'q...  
Nafas olmaysan...

## SUV

Yerning olti burjin sayd etdim dov-la,  
Kel endi, o'zimni, sayyodim, ovla.  
Oshiq ham, ma'shuq ham topmadim aslo  
Lovv -lovv lovullagan olovdan avlo.  
Kel, menga oshiq bo'l,  
Ma'shuq bo'l!

Quchsang, durri marjon yig'ib berurman,  
O'psang, Hasan-Husan tug'ib berurman.  
Kokillarim ila kamalak qilib,  
Jamiki ranglarni egib berurman.  
Kel, menga oshiq bo'l,  
Ma'shuq bo'l!

Ishqingda alanga – daryo bo'lurman,  
O'zimdanda kechurman, ayro bo'lurman.  
Har yoqqa o't purkab Qaqnus misoli  
Quchog'ingda yonib – yayrab o'lurman.  
Kel, menga oshiq bo'l,  
Ma'shuq bo'l!

## UY

Men bir imoratman,  
Ko'hna imorat.  
Ming yillardan buyon  
Nurab yotibman.

Kapalak qorlarni,  
Laylak qorlarni  
Yorilgan boshimdan  
Kurab yotibman.

Chakki o'taverar  
Qor-yomg'irlardan,  
To'lib ketaverar  
Tog'ora – yurak.

Ishq tuprog'in  
Qorib  
Qayg'u suviga  
Suvamasang  
Yashab bilma –  
Sang kerak.

## O'LLALLA

– O'llalla yor, o'llalla,  
So'zingni ayt, o'llalla  
Qaro diysan ko'zini,  
Ko'zini ayt, o'llalla.

– Ana olu va olu,  
Qara, olu va olu.  
Olularning ichida  
Sara olu va olu.

– O'llalla yor, o'llalla,  
Gapingni ayt, o'llalla.  
Shakkar diysan labini,  
Labini ayt, o'llalla.

– Ana olu va olu,  
Qara, olu va olu.  
Olu – olu ol – o – lud –  
Jon oluvchi olovu.

– O'llalla yor, o'llalla,  
Mashqingni ayt, o'llalla.  
Oshiq diysan o'zingni,  
Qo'shig'ingni ayt, o'llalla.

– Qo'shiq-qo'shiq, o'llalla,  
Ko'nglim teshik, o'llalla.  
Menga bir ko'ngil bersang,  
Aytgum qo'shiq, o'llalla.

## UCHINCHI ZOT

*“Har ikki odamni turguvchi bog‘lab,  
Uchinchi odam bor lekin dunyoda”.*

***Abdulla ORIPOV***

Men senga sevgimni etgandim izhor,  
Maslahat so‘rama dugonalardan.  
Gulim, seni mendek sevolmas qizlar,  
Sirimizni asra begonalaridan.

Odamlar qarasa boshing egmagin,  
Suqlanib-suqlanib visolimizga.  
Jonim, birovlarning ko‘zi tegmasin  
Ikkimizning baxt-u iqbolimizga.

But bo‘lsin baxtimiz – rizq-u ro‘zimiz,  
Biz sherik qilmaylik o‘tkinchi zotni.  
O‘g‘limiz bo‘lar u, balki qizimiz –  
O‘zimiz topamiz uchinchi zotni.

## SHOIR CHORI AVAZ MARSİYASI

*“Mangu osudadir mening maydonim,  
Bir umr bilmadi u nimadir jang”.*

Chori AVAZ

Cherik tortilmasdan,  
To‘qnashmay qo‘shin,  
Maydoning murdaga to‘larmi, Chori?!  
Nechun halok bo‘lding, do‘stginam, nechun?!  
Jangsiz maydonda ham o‘larmi, Chori?!

Jangsiz maydoningni qoldirib xoli,  
Jang qilgani kettingmi, Chori?!  
Dushman qolib,  
Do‘stlar ahvolin  
Tang qilgani ketdingmi, Chori?!

O‘limmidi askaring, Chori?!  
Ajalmidi lashkaring, Chori?!  
Kim bor edi sening yoningda  
Bir o‘zingdan tashqari, Chori?!

*1992-yil, 29-noyabr*



## YUZMA-YUZ

Tabiat yoz-qishda,  
Bahor-kuzda ham  
Menga bo'lmaydir  
Aslo mo'tadil.

Oh, yana boshlandi  
Mehrsiz iqlim,  
Oh-h, sov-vuqq  
Joo-on-jonimdan o'tadir.

Faqirgina ruhim,  
Zorgina ruhim...  
Titragay,  
Libosim juda ham yengil –

Ko'ngilchanman...  
Axir,  
Shul bor-u yo'g'im –  
Ishqdan pora bo'lgan  
Bir janda ko'ngil.

## **BOZBARAK**

Hech kim yer sharini ko'tarolmashmish,  
Tayanch nuqtasini topmashmish, biroq  
Mening bir qo'limda zamin chirpirak,  
Barmog'im uchida aylanar falak –  
Bozbarak...  
Bozbarak...  
Bozbarak...

Tugma qadab bo'lmas emish shamolga,  
Tutqich bermas emish hech kimga, biroq  
Men esa shamolning ikki betiga  
Tortib yuborganman ikki shapaloq –  
Bozbarak...  
Bozbarak...  
Bozbarak...

Hech kim ucholmashmish oyog'i bilan,  
Parvoz qilolmashmish osmonga, biroq  
Mening oyog'imda tolmas qanot bor,  
Mening oyog'imga joylangan yurak –  
Bozbarak...  
Bozbarak...  
Bozbarak...

Umr daryosidan kechdi bolalik,  
Shul daryo girdida qolgan charxpalak.  
Qamishday bo'yimga qo'ngan ninachi,  
Gulday hayotimdan uchgan kapalak –  
Bozbarak...  
Bozbarak...  
Bozbarak...

**NILUFAR GULDASTA**  
**turkum**

**CHORLOV**

Chaqiraman bor ovoz bilan:  
“Nilufar-uv, hoy, Nilufar-uv!”  
Chiqa qolgin, gulim, noz bilan,  
Hamma yoq tinch quygan kabi suv.

Ayriliqdan ezilgan yurak  
Seni qo‘msab chalayotir nay.  
Diydoringni ko‘rishim kerak,  
Kelaqolgin, jonim, aylanay!

Chaqiraman bo‘tadek bo‘zlab:  
“Nilufar-uv, hoy, Nilufar-uv...”  
Qulog‘imga yoqimli so‘zlab,  
Yuragimning armonlarin yuv.

Yelkamdagi farishta chorlar:  
“Nilufar-uv, hoy, Nilufar-uv!”  
Xilvatga kel, yulduzlar porlar,  
Nur sochar oy sen kabi suluv.

Sevgi – gulxan, ishq – nurli chechak,  
Ishq olovin o‘chirolmas suv.  
Seni juda sog‘indi yurak:  
“Nilufar-uv, hoy, Nilufar-uv!”

**NILUFAR**

Yerga emas, suvga otgansan ildiz,  
Nilufar, sut kabi oppoqsan, oqsan.  
Ko'kdan tushib, suvda porlagan yulduz,  
Ko'zim qamashadi husningga boqsam,

Nilufar – oq bilak, oq badan, oq to'sh,  
Go'yo tiniq suvda cho'milayotgan qiz.  
Qushdek uchib ketar xayol, aql-hush,  
Ruhim ko'piradi misoli dengiz.

Yuragim ishqingda eridi, suluv,  
Tuyg'ularim – daryo, ko'z yoshlarim – ko'l.  
Nilufarga zarur, axir, tiniq suv,  
Men toza suv bo'ldim, sen nilufar bo'l.

Nilufar yaprog'i suvga sochilar,  
Suv tubida turar poyasi qalqib.  
Biroq u osmonga qarab ochilar,  
Tabassum qiladi osmonga balqib.

Sen ham nilufardek, mayli, ko'kka boq,  
Husn-u jamolingdan yog'iladi nur.  
Menga hech qayrilib qarama, biroq  
Doim ochilib tur, gulim, kulib tur.

## XAYRLASHUVDAN SO'NG

Boqdim oydek jamolingga,  
Seni bekor suyganim yo'q.  
Xayrlashdik, visolingga  
To'yganim yo'q, to'yganim yo'q.

Uzun tunlar dardim aytib,  
Ko'ksingga bosh qo'yganim yo'q.  
Dudog'ingning gulxanida  
Kuyganim yo'q, kuyganim yo'q.

Yuzing o'pib, qulog'ingga  
Bir gap aytib qo'yganim yo'q:  
"Sendan boshqa parizotni  
Suyganim yo'q, suyganim yo'q!"

Sen ketding, men yig'lab qoldim,  
Izingdan shod yurganim yo'q.  
Diydoringga to'ymadim men –  
Seni aslo ko'rganim yo'q...

**ILK BO'SA**

Husning ko'rib, men sarxush bo'ldim,  
Tovusdayin tovlanar eding.  
Sayyod bo'lding, men bir qush bo'ldim,  
Chiroyingga ovlanar edim.

Labingdagi asal, bolingni  
Yalayman deb do'zaxga tushdim.  
Oy yuzingda qaro xolingni  
Cho'qiyman deb tuzoqqa tushdim.

\* \* \*

Oqqushginam, anglaysan meni,  
O'rgativoldim seni o'zimga,  
Diqqat bilan tinglaysan meni,  
Tushunasan hamma so'zimga.

Eritasan yuraklarimni,  
Chug'urlaysan yuzimga qarab,  
Barcha orzu-istaklarimni  
His etasan ko'zimga qarab.

Oqqushginam, nima ham derdim,  
O'qiy qolgin yozgan xatimni.  
Yuragimni men senga berdim,  
Senga berdim muhabbatimni.

## QUSH

Yuragimda bo'zlaydi bir qush:  
"Kuk-ku – jonim, qaydasan? Kuk-ku!"  
O'z juftini izlaydi bir qush:  
"Kuk-ku – yorim hech qayda yo'q-ku?!"

Men bilmayman uning otini:  
Bulbul, to'rg'ay, sa'va yo kakku.  
Eshitaman dod-faryodini:  
"Kuk-ku, kuk-ku, kuk-ku-ya, kuk-ku!"

O'tkir tig'li tumshug'i bilan  
Yuragimni cho'qiyveradi.  
Bezor qildi qo'shig'i bilan,  
Tinmay g'azal o'qiyveradi.

Rom ayladi husniga jonon –  
So'na, suqsur, oppoq qush, oqqu.  
Qalbim qushi sayradi chunon:  
"Kuk-ku, kuk-ku, kuk-ku – men toq-ku?!"

Ko'nglim zada bo'ldi, dilim xun,  
Qushga buncha dard berding, hayot?!  
O'sha qushdek yuragim bir kun  
Uchib ketar chiqarib qanot.



\* \* \*

“Gah” dedim, yor,  
Qo'lga qo'nding qush bo'lib,  
Bilagimda tirnog'ingning izi bor.

“Oh” dedim, yor,  
Dilga qo'nding tush bo'lib,  
Yuragimda oyog'ingning izi bor.

“Shoh” dedim, yor,  
Qatl aylading ishq bo'lib,  
Suyagimda firog'ingning izi bor.

Ishq yarasi tuzalmaydi, bitmaydi,  
Gulim, sensiz aslo kunim o'tmaydi.

\* \* \*

Azizam, men seni sog'ingan onim,  
Xazondek xor bo'lar bog'im, bo'stonim.  
Faqat sen bo'lursan dardimga malham,  
Sensiz zerikarli bu hayot, jonim.

\* \* \*

Jonim dedim, gulim dedim,  
Senga oshiq dilim dedim.  
Agar menga qaramasang,  
Hayot menga o'lim dedim.

Qoboqlaring bodom, dedim,  
Seni sevdim mudom, dedim.  
Visolingga yetishmasam,  
O'lib ketar odam, dedim.

\* \* \*

Hijron ko'p cho'zildi, visoling uzoq,  
Kunlar bir-birini o'tar quvishib.  
Gar javob bermasang, qilsam qo'ng'iroq,  
Jim qolsang yuragim ketar uvishib.

Jonim, sog'inaman seni erta-kech,  
Ne dardga muhtalo bo'ldik sevishib?  
Seni ko'rmasam men chidolmayman hech,  
Jim qolsang yuragim ketar uvishib.

\* \* \*

Ey gul!  
Tonggi shabnamdan ham beg'ubor, tiniq  
Ko'z yoshlarim bilan seni sug'ordim.

Ey gul!  
Mehrim nuri bilan o'stirdim aniq,  
Yurak tuyg'usidan sabo yubordim.

Meni unutdingmi, oppoq atirgul?  
Seni sog'ingandim, ochmading dudoq.  
Bir so'z ham aytmading bir boqish tugul,  
Bu dunyoda sensiz yashayman qandoq?

## QOR

Qor husningdek go'zal, qalbingdek oppoq,  
Biroq hijroningdek sovuq, sevgilim.  
Qor orzungdek toza, xayolingdek pok,  
Eriq quyosh borsa yovuq, sevgilim.

Quyosh kabi sevsam, qordek yig'laysan,  
Qor – qizsan, shodlikdan ko'z yoshlaring sel.  
Sevmasang muzlaysan, dilni tig'laysan,  
Faqat muzlamagin, eriy qolgin, kel.

## YANA QOR

Raqqosadek o'ynab yog'ayapti qor,  
Yuragimni qiynab yog'ayapti qor.  
Vaslingga intildim, yo'limni to'sdi,  
Bopladim deb o'ylab yog'ayapti qor.

\* \* \*

Seni sevdim, seni, qalamqosh,  
Ayriliqqa yo'q menda bardosh.  
Kecha-kunduz yuzingga qarab,  
Oyog'ingga qo'yib yotay bosh.

\* \* \*

Bosgan qadamingga qilaman sajda,  
Oyog'ing tuprog'i ko'zga to'tiyo.  
Sen samodan tushgan mo'jiza, mujda,  
Sen kabi go'zalni ko'rmagan dunyo.

\* \* \*

Dedim: menga sensiz yo'q endi hayot,  
Dedim: sevgilimsan tengsiz, bebaho.  
Yuragimni ochib adashdim, nahot?  
Nahot, ko'ngil berib qildim men xato?

\* \* \*

Olamga nur sochar husning, quyoshing,  
Go'zallik tojiga yarashgan boshing,  
Sodiq sirdoshingman, yaqin dildoshing,  
Malikam, men sening umr yo'ldoshing,  
Jonginam, men sening umr yo'ldoshing.

\* \* \*

Lol etdi oy yuzing ziyosi,  
Bo'sa oldim, labing bo'ldi nam.  
Gulg'unchaga tom di go'yoki  
Yulduzlardan to'kilgan shabnam.

\* \* \*

Oftobning yuziga to'silgan parda,  
Tog'larning boshiga o'ralgan ro'mol.  
Turnalardek baland uchib ketolmas  
Yomg'irda qanoti ho'l bo'lgan shamol.

\* \* \*

Mayda qadam tashlab yuradigan sarv,  
Chiroyli jilmayib turadigan sarv.  
Nozik bo'yi, suluv qomati bilan  
Yurakdan bexato uradigan sarv.

## NOLA

Oqshom ufq ortiga berkinar quyosh,  
Bulutlar ortiga yashrinar yulduz.  
Hech kinga bildirmay to'kaman ko'z yosh,  
Dardimni ichimga yutaman yolg'iz.

Meni ado qilar yurakdagi sir,  
Cho'g' kabi o'rtaydi dilni pinhon dard.  
Chiroyingga qulman, husningga asir,  
Ishqimni dunyodan yashirishim shart.

Momaqaldiraqdek gumbirlaydi g'am,  
Yurakni ikkiga bo'ladi yashin.  
Yalt etib bir lahza yorishar olam,  
Sel qiladi yig'lab osmon ko'z yoshin.

Kunni bulut to'ssa yumilar lola,  
Quyosh chiqmasa gul sochmaydi ifor.  
Jamoling ko'rmasam, dilimda nola,  
Yuzingga boqmasam, ko'nglimda g'ubor.

Nahotki, uzlatga chekinsa shamol?!  
Nahotki, vaslingdan aylasang judo?!  
Nahotki, sevgimiz topmasa kamol?!  
Nahotki, marhamat qilmasa Xudo?!

## NONUSHTA

Asal bilan qaymoqqa  
Non botirdim, yor-yor.  
Oq badani qaynoqqa  
Jon botirdim, yor-yor.

Qizning husni, chiroyi  
Nozik bo'lar, yor-yor.  
Bir boqishi olti oy  
Oziq bo'lar, yor-yor.

Qiz bolaning qo'lida  
Uzuk bo'lar, yor-yor.  
Bizning visol bazmimiz  
Qiziq bo'lar, yor-yor.

Yuragimni xushlasang,  
Yulduz bo'lar, yor-yor.  
Ko'ngil ishq daryosida  
Qunduz bo'lar, yor-yor.

\* \* \*

Yashirmayman, seni sevaman,  
Biroq umrim achchiq va taxir.  
Hayron bo'lma, o'zingni emas,  
Yuragingni sevaman, axir.

Aql bilan, iroda bilan  
Jilovlayman tuyg'ularimni.  
Yulduzlarga so'zlayman oqshom  
Yurakdagi qayg'ularimni.

Kuz. Mening ham ko'nglimda armon,  
Ayriliqdan qaddim bukildi.  
Orzuimning daraxtlaridan  
Qovjiragan yaproq to'kildi.

Eshitdimki, yig'laganmishsan,  
Fido bo'lay aziz boshingga.  
Arzimaydi bu dunyo, erkam,  
Ko'zlaringdan to'kkan yoshingga.



## BAXTIMNING JAVHARI

*Naziraga*

Lablaring bol, shakar bo'salaring qand,  
Bol, shakar, qand bilan meni qil xursand.

Sen husn qaymog'i, gulning shirasi,  
Chiroy malikasi, qizlar sarasi.

Sen ishq lazzatisan, sevgi ne'mati,  
Visol latofati, hajr nazokati.

Umrin mazmunisan, kayfim mazasi,  
Noz-ne'matlar ichra asil, tozasi.

Ko'z yohsan, ruhimdan tomgan yoniq suv,  
Ezilgan yurakdan chiqqan tiniq suv.

Ko'zlarimning nuri, gavharisan sen,  
Baxt-u iqbolimning javharisan sen.

\* \* \*

Kun bo'lmaydi tunsiz, kunduzsiz,  
Osmon bo'lmas oysiz, yulduzsiz.  
Bu dunyoda sensiz yashamoq –  
Ichgan kabi ovqatni tuzsiz.

Mening oyim, yulduzimsiz siz,  
Quyoshim siz, yolg'izimsiz siz.  
Umrin faqat qaro tun emas,  
Oppoq tongim, kunduzimsiz siz.

### **NILUFAR**

Sen borsan, bu olam muattar,  
Sen borsan, bu dunyo munavvar.  
Ko'ngli pok, naqadar go'zalsan,  
Nilufar, Nilufar, Nilufar.

Gapirsam, so'zimni uqasan,  
Bir gulsan, qalbimni yoqasan,  
Sen menga juda ham yoqasan,  
Nilufar, Nilufar, Nilufar.

\* \* \*

Ishdan so'ng uyiga shoshadi hamma,  
Men sening vaslingga shoshaman, erkam.  
Visolingga yeta olmayman ammo,  
Uchrasha olmaymiz oqshomda hech ham.

Ishdan so'ng oyog'im bo'ysunmas menga,  
Qadamim ergashar bosgan izingdan.  
Yo'lma-yo'l yalinib boraman senga,  
O'ksinaman "Qolgin" degan so'zingdan.

"Xayr!" deysan, boshim qoladi gangib,  
Yuragim tinimsiz chalar qo'ng'iroq.  
Ketasan odamlar ichiga singib,  
Ko'nglim ayriliqqa ko'nmaydi biroq.

Faqat tong otganda kelasan ishga,  
Faqat tong otganda uchrashmoq mumkin.  
Tonggacha yuragim tushar tashvishga,  
Tonggacha kim menga beradi taskin?

Kutaman otguncha visoling tongi,  
Kutaman toki sen kelguncha ishga.  
Men seni har kuni sevaman yangi,  
Men seni har kuni sevaman boshqa.

## MUATTAR GUL

Yuragimda bir yoqimli kuy,  
Xushbo'y atir sotadi attor.  
O'sha farang atiri xushbo'y,  
Biroq sendek emas muattar.

Mayli, goho mushki anbar qo'y,  
Yuragimni qitiqlar badtar.  
O'sha mushki anbar ham xushbo'y,  
Biroq sendek emas muattar.

Jonim, senga qilib qo'ng'iroq,  
Atirlarin maqtaydi attor.  
Barcha atir xushbo'ydir, biroq  
Ular sendek emas muattar.

Bog'da gullar rang-barang, xushro'y,  
Bog'da gullar qiz kabi dilbar.  
Gullar bari juda ham xushbo'y,  
Biroq sendek emas muattar.

## ALLA

Oqshom senga ertak aytib berar oy,  
Yulduzlar kuylaydi sirli afsona.  
Tongda o'choq yoqib, quyosh tashir choy,  
Nonushta tayyorlar gullar shohona.  
Alla, erkam, alla-yo!  
Qizalog'im, alla-yo!

Bulbullar husningni madh etar sayrab,  
Xushbo'y ifor purkab, yelpiydi sabo.  
G'unchalar qiqirlar chehrangda yayrab,  
Oyog'ing ostiga tiz cho'kar samo.  
Alla, jonim, alla-yo!  
Erkatoyim, alla-yo!

Tovuslar tovlanib, aylar tamanno,  
To'tiqushlar burro gapirar jo'shib.  
Chiroyingga aytish uchun tasanno  
Ohular keladi tog'lardan tushib.  
Alla, jonim, alla-yo!  
Qizalog'im, alla-yo!

## QUYOSH BOTAYOTGANDA

“Quyosh botar, – deysan go‘zal qiz, –  
Uyingizga borib, oling dam”.  
Xobxonangga kirasan yolg‘iz,  
Yuragimni xun etar bu dam.

Quyosh botar, yuragimda g‘am,  
Ayriliqdan o‘rtanadi jon.  
Ketayapsan, sening qalbing ham  
Botayotgan quyosh kabi qon...

## QUYOSHIM

Muhabbat tufayli mehrni bildim,  
Dilimda shukrona, tilimda bayot.  
Parvona misoli nurga talpindim,  
Quyoshim, sen bilan munavvar hayot.

## KECHA

Deysanki: “Bir kecha emas ming kecha”.  
Dedim: “Sensiz kecha – alam, mung kecha”.  
Bir kecha hajringda shuncha g‘am yutdim,  
Boshdan o‘tdi necha mingga teng kecha.

## BO'YINBOG'

Ko'chaga kuzatgan vaqtingda, jonim,  
Mahkam bog'lab qo'ygin bo'yinbog'imni.  
Qayda bo'lmay doim eslab yurayin  
Sen bilan baxtiyor bo'lgan chog'imni.

Barmoqlaring bilan bo'ynimni silab,  
Bo'yinbog'ni qattiq tugib qo'y bugun.  
Jonim, sevgimizni eslatib tursin,  
Bo'ynimga osilgan tumordek tugun.

Bo'yinbog' tumorin mustahkam bog'la,  
Bog'lagandek ahd-u paymonimizni.  
Sevgini yurakda asraylik, jonim,  
Qallda asragandek iymonimizni.

Yurakdagi mehr, harorat bilan  
Sevib ardoqlaylik bir-birimizni.  
Yaratganning o'zi muhabbat bilan  
Bog'lab qo'ydi bizning taqdirimizni.

## SEVGI SAYQALI

Tog'lar cho'qqisini o'tkirlar shamol,  
Tebratib daraxtni chayir qilar yel.  
Tog'dek yuragimni charxlar oyjamol,  
Daraxtdek qaddimni egar xipchabel.

Oftob olmalarga rang berar qirmiz,  
Mevani pishirar otash bilan nur.  
Qalbimni olmadek qizartirar qiz,  
Yurakni pishirar sohibjamol hur.

Gulning shirasidan yig'ilar asal,  
Rangdor naqshlar bilan serjilo bino.  
Muhabbat ruhimga bermoqda sayqal,  
Sevging yuragimga bermoqda jilo.

Qumlarning ichida saqlanar yombi,  
Teran dengizlarning tubida olmos.  
Sahrodek qalbimda o't koni yondi,  
Dengizdek keng ko'nglim chiroyingga mos.



**FEMIDA**

Sen menga shokolad berding, azizam,  
Atirgul qog'ozli, Femida nomli.  
Shirinlikni ko'rding men bilan baham  
Muhabbat mazali, muhabbat ta'mli.

Femida. Yodimga tushdi ma'buda.  
Femida. Balki bu irim, ishorat.  
Jonginam, men seni sevaman juda,  
Femida nimani qilur bashorat?

Botir Prometeyni tuqqan Femida  
Ma'budlar taqdirin bashorat qilgan.  
Kelajakni ravshan uqqan Femida,  
Hatto Zevsning ham sirini bilgan.

Farzandi Prometey himmati bilan  
Olimpdan olovni keltirgan ayol.  
Xudoning ilohiy ne'mati bilan  
Odamzod baxtini kuldirgan ayol.

Sen mening taqdirim, mening baxtimsan,  
Femida bashorat qilib turibdi.  
O'lsam ham qaytmayman aslo ahdimdan,  
Femida sirimni bilib turibdi.

Sen menga shokolad berding, azizam,  
Atirgul qog'ozli, Femida nomli.

## ERKALASH

Bittagina bo'sa olayin  
G'unchagina dudoqchangizdan.  
Belingizdan aylanay, jonim,  
Aylanayin oyoqchangizdan.

Erib ketsin shakar armonim  
Issiqqina quchoqchangizda.  
Lovullatay sevgi gulxanin  
Yurak degan o'choqchangizda.

Ishqqa tashna ko'nglim suv ichsin  
Mehr degan buloqchangizdan.  
Shirin so'zlab tishlab qo'yayin  
Mittigina quloqchangizdan.

Sevgi degan taom tiladim  
Sizning tilla tovoqchangizdan.  
Endi qanday omon qolaman  
Qoshingizdan, qovoqchangizdan?

Bittagina o'pib qo'yayin  
Oppoqqina tomoqchangizdan.  
Gul hidlayin, meva terayin  
Yashnab turgan gulbog'changizdan.

## GULIQAHQAH PARI

Guliqahqah pari, Guliqahqah gul,  
Kulging jonga yoqar, qah-qah urib kul.  
Sehri kulgingni eshitganimda  
Yurak yonib ketar, yurak bo'lar kul.

Guliqahqah pari, Guliqahqah gul,  
Yurak pitirlaydi qush kabi nuqul.  
Dudog'ingda suv ber, lablaringda don,  
Chirqirar qalb qushi – qafasdagi qul.

Guliqahqah pari, Guliqahqah gul,  
Hijron dashti issiq, jazirama cho'l.  
Yurak nola chekar visolingga zor,  
Tikanzor ichinda misoli bulbul.

Guliqahqah pari, Guliqahqah gul,  
Tun bo'yi yig'ladim, yostiqlarim ho'l.  
Sevgi tuyg'usining, ishq ne'matining  
Nega rohati kam, azoblari mo'l?!

Guliqahqah pari, Guliqahqah gul,  
Mehringga muhtojman, uzat menga qo'l.  
Ishq yo'lidan yolg'iz yurib bo'lmaydi,  
Menga hamroh bo'lg'in, menga yo'ldosh bo'l.

## HIJRON KECHASI

O'rningni hech qachon bosolmas hech kim,  
Mehringga hech nima kela olmas teng.  
Sensiz tinchimas hech beqaror ko'nglim,  
Hech qayga sig'mayman garchi olam keng.

Ko'zlarim qush kabi uchar qo'nimsiz,  
Ichimdan bir nima uzilgan kabi.  
Yuragim g'uvillab turar tinimsiz,  
Arilar uyasi buzilgan kabi.

Qirmizi gullar ham tuyular rangsiz,  
Xayollarim chalkash, yuliq va uziq.  
Taslim bo'lgandekman taqdirga jangsiz,  
Sensiz menga hayot emasdir qiziq.

Hushimni yo'qotib-hushimga kelib,  
Ko'rmasam, bo'tadek bo'zlayman, jonim.  
Sargardon kezaman shamoldek yelib,  
Hamma joydan seni izlayman, jonim.

Nahot shuncha cheksiz sabr-u toqating,  
Nahotki, shuncha keng bo'lsa yuraging.  
Jondan o'tib ketdi, axir, furqating,  
Sevgilim, qayerdan izlay daraging?

Seni erkalayman, jonim, har kuni,  
Yuragingni sevgim bilan to'ldirib.  
Faqat bir iltimos ayriliq tuni –  
Hijron oqshomida qo'yma o'ldirib.

## MAKTUB

Sevaman deb, maktub bitaman  
Daftaringning varoqlariga.  
Nurdek yonib singib ketaman  
Ko'zlaringning qaroqlariga.

## NASIBAM

Ilohiy nasibam, noz-u ne'matim,  
Sut kabi tozasan, nondek halolsan.  
Qadding naydek nozik, sarv qomatim,  
Husnda yagona sohibjamolsan.

## FARISHTAM

Farishtam, sen bilan tunlarim sirli,  
Farishtam, sen bilan kunlarim nurli.  
Vasling-la kechalar biram sehrlı,  
Husning-la kunduzlar biram mehrli.

\* \* \*

Chiroyingni qancha madh aylasam oz,  
Ta'rifingga so'zlar yetmaydi tilda.  
Husning maqomiga yetmas navo, soz,  
Sendek go'zal tuyg'u faqat sof dilda.

## NAY VA TANBUR

Bo'ying tanburdekkina,  
Qomating naydekkina.  
Nozixsan hurdekkina,  
Suluvsan oydekkina.

Nay labingga bosib lab,  
Nay chalay kuyib-kuyib.  
Tanburdek soz quchoqlab,  
Kuy chalay suyib-suyib.

Oyni quchoqlayman deb,  
Qalb qushimni yo'qotdim.  
Hurni quchoqlayman deb,  
Es-hushimni yo'qotdim.

## DULDUL

Ko'ksimda yuragim – qanotli otim,  
Farishta silardi nurli yollarin.  
Duldul zotli otim, qush zotli otim  
Sevardi parining oqqush qo'llarin.  
Otga qaramadi oqqush parizot,  
Oqshom kishnab-kishnab faryod chekdi ot.

**PALTO**

Qaddu bastingizga yarashgan  
Qora palto, yoqasi qunduz.  
Qadamizda noz-u karashma,  
Ko'zingizda yonadi yulduz.

Qora palto va qunduzingiz  
Husningizga qo'shilgan chiroy.  
Sochingiz – tun, oppoq yuzingiz –  
Tun qo'ynida shu'la sochgan oy.

Yechib qo'ydim xonamda, erkam,  
Egningizdan paltoyingizni.  
Diydoringiz bilan, malikam,  
Shod qildingiz gadoyingizni.

Lola unar dudog'ingizdan –  
Ishqqa chorlab deydi: "Kul-o'yna".  
O'par oppoq tomog'ingizdan  
Bo'ynigizga o'ralgan mo'yna.

Palto kabi qaniydi men ham  
Ko'rsam edi rohatingizni.  
Uzun palto o'ralib mahkam  
Quchib turar qomatingizni.

Xayrlashdik, qo'ydim kiydirib  
Egningizga paltoyingizni.  
Zor qildingiz, yana kuydirib  
Ishqingizda adoyingizni.

## KUTAMAN

Maftun bo'lib go'zal, tengsiz husningga,  
Senga mos so'z izlab, she'rlar bitaman.  
Yetmoq umidida shirin vaslingga,  
Sevgilim, kutaman, seni kutaman.

Asal lablaringdan bol totmoq uchun  
Har kun, kerak bo'lsa, zahar yutaman.  
Bir tong quchog'ingda uyg'onmoq uchun,  
Sevgilim, kutaman, seni kutaman.

Qaro sochlaringni silamoq uchun  
Baland tog'lardan ham oshib o'taman.  
Labingni labimga ulamoq uchun,  
Sevgilim, kutaman, seni kutaman.

Bir kuni albatta ohu ushlayman,  
Bir kuni daryodan baliq tutaman –  
Qalbingni ovlayman, ko'ngling xushlayman,  
Sevgilim, kutaman, seni kutaman.

Husn-u chiroyingdan aqldan ozib,  
Qo'yningda hushimdan ketib yotaman,  
Ishqingda ko'zimning yoshin oqizib,  
Sevgilim, kutaman, seni kutaman.

Balki, visolingga yetarman zora,  
Balki, yetolmasdan o'lib ketaman.  
Ko'zlaringga boqmoq uchun bir bora,  
Sevgilim, kutaman, seni kutaman.



## OHANG

Bir ko'rsam, oyim,  
 Diydingizni,  
 Guldek chiroyli  
 Ruxsoringizni.  
 Nola qilurman  
 Bulbul misoli,  
 Ishq birla chertib  
 Dil toringizni.

Bildirmadingiz  
 Izhoringizni,  
 Hijronda chekdim  
 Ozoringizni.  
 "Kelgaymi?" desam,  
 Aytdi shamollar:  
 "Yo'q-yo'q", "yo'q, aslo",  
 "Zinhor"ingizni.

Siylab qo'ying bir  
 Shunqoringizni,  
 Siz tomon uchgan  
 Ilg'oringizni.  
 Suydim yagona  
 Ko'rk-u chiroyda  
 Osmonga yetgan  
 Viqoringizni.

## MEHRI DARYO

Mehri daryosan-ku, mening suluvim,  
Nurga tashna bo'ldim bamisli giyoh.  
Sahroda quduqdek quridi suvim,  
Hajringda maysadek kuyib ketdim, oh!

Mehri daryosan-ku, axir, sevgilim,  
O'zing kelib, mening ahvolimni ko'r.  
Qizg'aldoq misoli so'lmoqda gulim,  
Peshonam sahroning tuprog'idek sho'r.

Mehri daryosan-ku, jonim, jonginam,  
Senga teng na ko'z yosh, na yomg'ir, na sel.  
Daryodek bo'lolmas qor ham, yomg'ir ham,  
O'zing quchog'imga daryo bo'lib kel.

Mehri daryosan-ku, farishtaginam,  
Jayxundek, Sayhundek ikki quloching.  
Qumlarga o'tirib qoldi ishq kemam,  
Tortib olsin yo'g'on o'rilgan soching.

Mehri daryosan-ku, mening go'zalim,  
Sarg'aygan yuzlarim barxandek so'lg'in.  
Ko'z yosh to'kdim ikki ko'zimdan lim-lim,  
Oh-zorimdan undi yantog'-u yulg'in.

Mehri daryosan-ku, chiroyli ohum,  
Yuragimda turdi quyun, garmsel.  
Axir, ko'zlarimga to'lib qoldi qum,  
Axir, tuz sochdi-ku ko'zlarimga yel.

## YOLG'IZ KULBA

Bugun seni kutdim kun bo'yi,  
Ikki ko'zim eshikdek ochiq.  
Huvilladi vujudim uyi,  
Yurak – o'choq, tutadi achchiq.

Kutdim, yog'di pag'a-pag'a qor,  
Ikki eshik yopilgani yo'q.  
Izg'irinda kutdim intizor,  
Kirib ketdi uyimga sovuq.

Yurak – o'choq, yondi umidvor,  
Lovulladi kun bo'yi olov.  
Gupillatib yog'averdi qor,  
Isinmadi o'choqda birov.

Sen kelmading, omad kulmadi,  
Umidlarim go'yo ho'l o'tin.  
Olisdagi yolg'iz kulbaning  
Mo'risidan o'rladi tutun.

## ILTIJO

Balki telba bo'ldim, balki devona,  
Xayolimda seni o'ylayveraman.  
Aqlimdan, hushimdan bo'ldim begona,  
Ishqimni tinimsiz so'ylayveraman.

Barcha oh-u zorim bekor, behuda,  
Havoga uchadi bamisli shamol.  
Kunim yo'q, tunim yo'q sokin, osuda,  
Qalbmni tig'laydi intizor xayol.

Nimalardir yozsam, qog'oz qoralab,  
Faqat sen haqingda so'zlaydi qalam.  
Qaygadir yo'l olsam hayot oralab,  
Yurak sen tomonga tashlaydi qadam.

"O'ylamayman!" deyman,  
Deyman: "Bo'ldi, bas!"  
Bilaman, sen bilan yashay olmayman.  
Biroq yasholmayman sensiz bir nafas,  
Go'zal sevgilimdan voz kecholmayman.

Xohla, qatl aylagin,  
Xohla, shafqat qil.  
Xohlasang, qul kabi ezib, xor ayla.  
Xohla, qahr aylagin,  
Xohla, himmat qil,  
Ne qilsang ham, menga e'tibor ayla.

## CHIROQ

Xonamda yongan chiroq  
O'chmadi otguncha tong.  
Nur taratdi yaltiroq,  
Qo'ng'iroqdek urdi bong.

Yonimdagi o'rning bo'sh,  
Uxlolmadim to'lg'onib.  
Visoling bamisli tush  
Xayolimda uyg'onib.

Yonimda yo'qsan, jonon,  
Yuragimda joying bor.  
Qo'shganman qoningga qon,  
Zuvalamda loying bor.

Nozikkina qaddingni  
Qovurg'amdan yaratdim.  
Cheklamadim haddingni,  
Bor mehrimni qaratdim.

Yonimga kel, yolg'izim,  
Quchsam, bag'rim to'ladi.  
Sensiz qolsam bir o'zim,  
Menga qiyin bo'ladi.

## ARAZ

Kechir, dilbar, intilaverib,  
Bezor qilib yubordim seni.  
O'z holingga qo'yaman, jonim,  
Hech bezovta qilmayman endi.

Qo'lim yetmas ko'kdagi oyga,  
Shashtim sindi, umidim so'ndi.  
Yig'layverib bekor, behuda,  
Sen kelmading, ko'z yoshim tindi.

Yonib bitdim sog'inib juda,  
O'zim yig'lab, o'zim ovundim.  
Tushlarimda ko'rib gohida,  
Murodinga yetdim, sevindim.

Yonginangdan shovullab oqdim,  
Daryo kabi, qolmadi qadrim.  
Mehring tilab intizor boqdim,  
To'lib-toshib to'kildi sabrim.

Or qilarsan balki sevgimdan,  
Odamlardan uyalib, jonim,  
Balki sening tenging emasman,  
Men tuproqman, sensan osmonim.

Yerga uraverdim qadrimni,  
Oyog'ingga sajdalar qildim.  
Tushunmading mening dardimni,  
Senga loyiq emasman, bildim.

## **BAHORIM**

Seni ko'rsam, erir tog'larning qori,  
Seni ko'rsam, ketar ko'ngil g'ubori,  
Seni ko'rsam, yangrar yurakning tori,  
Seni ko'rsam, qonar ko'zim xumori,  
Bahorim, bahorim, go'zal bahorim!

Qoshlariga o'sma qo'ygan bahorim,  
Ko'zlariga surma surgan bahorim,  
Sochlariga guldan popuklar boylab,  
Xushbo'y atir sochib turgan bahorim,  
Bahorim, bahorim, go'zal bahorim!

## **QALDIRG'OCHIM**

Qaldirg'ochim, mening chiroyli qushim,  
Quyoshni, mehrni yaxshi ko'rasan.  
Senga uya bo'ldi yuragim – to'shim,  
Sevgini, sehrni yaxshi ko'rasan.  
Kel, mening bag'rimda uchaver yayrab,  
Kulib tabassum qil, chug'urlab sayrab.

## ZUMRAD

Kum-ko'k bahor zumrad, giyohlar zumrad,  
Atirgul qabosi, g'unchalar zumrad.  
Yer-u osmon zumrad, nigohlar zumrad,  
Qirlar zumrad, tog'lar bunchalar zumrad.

Daraxtlar zumraddir, yaproqlar zumrad,  
Daryolar ham zumrad, buloqlar zumrad,  
Yaqinlar zumraddir, yiroqlar zumrad,  
Yurakni zanglatgan firoqlar zumrad.

Sevgim, tuyg'ularim zangori, zumrad,  
Oshiqlar, muhabbat diyori zumrad.  
Hayotimning naqsh-u nigori zumrad,  
Intizor ko'zimning xumori zumrad.

## XILQAT

Chiroyli yaratgan seni tabiat,  
Xudo ato etgan tengsiz latofat.  
Husn-u jamolingni ta'riflay desam,  
Topilmas husningdan ortiq so'z, sifat.



## MENI KO'RGING KELADIMI?

Labimda muhabbat sharobin tutsam,  
Tonggacha yulduzdek ko'z yummay kutsam,  
Shamoldek derazang yonidan o'tsam,  
Hijroning zahrini mardona yutsam,  
Meni ko'rging keladimi?

Ishqingda sayrasam misoli bulbul,  
Yuragimdan uzib bersam qizil gul,  
Boqmasang, arazlab o'tirsam nuqul,  
Dunyoni aylasa ko'z yoshlarim ho'l,  
Meni ko'rging keladimi?

Saharda – uyg'onsam quyoshdan avval,  
Ishqingda o'rtanib nur sochsam yal-yal,  
Uzuring ko'zida bo'lsam gavhar, la'l,  
Bilagim bo'yningda bo'lsa har mahal,  
Meni ko'rging keladimi?

\* \* \*

Hayot o'zi shunday chamamda,  
Goh xafasan, gohida xursand.  
Nimadandir ko'ngling o'sganda  
Nimadandir yeb turasan pand.

\* \* \*

Bugun mayin shabada kezar,  
Ko'nglim sizga intiqlik sezar.  
Balki firoq diydordan o'zar,  
Qalbda umid ilinji suzar.

\* \* \*

Yor, senga qilsam qo'ng'iroq,  
Telefoning o'chirilgan.  
Meni yomon qiynar firoq,  
Xushim senga ko'chirilgan.

Yuragim chalar qo'ng'iroq,  
Ruhim qushi uchirilgan.  
Sendan so'ray desam so'roq,  
Telefoning o'chirilgan.

\* \* \*

Qarab tursam sening oydek jamolingga,  
Qading sarv, bo'yi-basting hurga o'xshaysan.  
Xudo mehr bergan husn-u kamolingga,  
Vujuding gul, badaning durga o'xshaysan.

\* \* \*

Sen bir gulsan isi ko'p,  
Muattar iforing kelib turadi.  
Sen bir hursan ishi ko'p,  
Hijroning ustimdan kulib turadi.

\* \* \*

Kaklikmisan, kabutarmisan?  
Sevib intizor kutarmisan?  
Yo'lda seni poylab turibman,  
Biz tomondan bir o'tarmisan?

\* \* \*

Yuragimni rom aylagan chiroyi,  
Husn-u jamol xazinaboni – boyi,  
Sevgi diyorining quyoshi, oyi,  
Tanho o'zingsan, jonim,  
Sohibjamol jononim.

\* \* \*

Intizorman oftob jamolingizga,  
Nogoh xayolimni olib qochasiz?  
Zavol yo'q husn ila kamolingizga,  
Chiroy taratasiz, chiroy ochasiz?

Boshimda bir savdo – ko'lanka, soya,  
Bodom qabog'ingiz – surmarang bulut.  
Yuragim – oppoq qor qoplangan qoya,  
Ko'nglim mehringizdan bebahra, unut.

Kungaboqar kabi boqaman faqir,  
Shamoldek chopaman xizmasingizga.  
Siz mehr beraman desangiz, axir,  
Chek-u chegara yo'q himmasingizga.

Meni qatl aylashga hamisha tayyor,  
Saf tortib turadi kipriklaringiz.  
Qoshlaringiz yoydek egilgan ayyor,  
Buncha omonat qilko'priklaringiz...

Yuzingiz – charaqlab nur sochgan quyosh,  
Quyoshdan qamashib ketadi ko'zim:  
Boqsam, ko'zlarimdan to'kilar ko'z yosh,  
Boqmasam, sog'inib yig'layman o'zim.

**OHU**

Topolmaysan yer yuzin izlab,  
Senga mendek fido insonni –  
Topmagandek falakni ko'zlab,  
Quyosh kabi bir mehribonni.

Odamlar bor makkor, shum, ayyor,  
Odamlar bor ichi kir, baxil –  
Yirtqich kabi hamlaga tayyor,  
O'lja izlab yurishar nuqul.

Sen ohusan chiroyli, ko'rkam,  
Sen kiyiksan bejirim, nafis –  
Bamisoli qushdeksan, erkam,  
Juda nozik, juda hurkak his.

Yirqichlardan bo'lg'in ehtiyot,  
Tulkilardan doim bo'l uzoq.  
Qadamingni poylaydi sayyod,  
Yo'llaringga qo'yadi tuzoq.

Tabiatning ko'rkisan o'zing,  
Senga jonim qurbon, quralay!  
Muhabbatning timsoli ko'zing  
Suluvlarga armon, quralay!

Cho'qqilarda chopaver chaqqon,  
Yovuzlardan hamisha ogoh.  
Tog'lardagi eng suluv jonon,  
Seni o'zi asrasin Oллоh!

\* \* \*

Baland qirlar po'sib qolar shashtingdan  
Izingda chang to'zib qolar shashtingdan,  
Tog'lar yelka qisib qolar shashtingdan,  
Keng yaylovlar qizib qolar shashtingdan,  
Arg'umog'im!

\* \* \*

Men qushman, qo'lingdan yegim kelar don,  
Labingdan suv ichib, bergim kelar jon.

\* \* \*

Seni kutdim qorayguncha qosh,  
Ikki ko'zim to'rt bo'lib mahtal.  
Yuragim xun, bag'rim – qon quyosh,  
Yulduz bo'ldim tun cho'kkan mahal.

Seni kutdim quloqlarim ding,  
Na sado, na "tiq" etgan tovush.  
Seni kutdim ko'zlarimda mung,  
Qaroqlarim bejo, sertashvish.

## BESH KUNLIK DUNYO

Yorug' dunyodagi qadimgi ayvon,  
Shiftida yulduzlar yonadi oqshom.  
Qoshini quyoshga tutgan peshayvon,  
Shu'laga g'arq bo'lib qoladi oqshom.

G'animat, deydilar, bu dunyo besh kun,  
Boshingdan o'tadi besh kecha-kunduz.  
Axir, quyosh yonib nur yog'ar har kun,  
Axir, shu'la sochar har kecha yulduz.

Insonga takalluf aylaydi dunyo,  
Inson mehmon erur, bu dunyo mezbon.  
Agar mezbon bo'lsa, siylaydi dunyo,  
Agar mehmon bo'lsa, siylanar inson.

Va lekin olmoqning bermog'i ham bor,  
Albatta, kelmoqning ketmog'i bordir.  
Ketgan mehmon yana kelmagay takror,  
Uyi keng dunyoning yuragi tordir.

## “TO‘QSONINCHI YILLAR DAFTARI” dan

Yorijonim, zulfing – qo‘ng‘iroq,  
Mening yongan yuragim – chiroq.  
Karvonimiz adashmas aslo,  
O‘rtamizga tushmagay firoq.

Toki hayot ekan bu hayot,  
Sening sevging dilimda bayot.  
O‘lsam, faqat ishqdan o‘lgayman,  
Yana ishqdan topgayman najot.

Yorijonim, soching – majnuntol,  
Labing – g‘uncha, dudoqlaring bol,  
Qoshing – qunduz, ko‘zlaring – yulduz,  
Jamoling – oy, yonog‘ing – hilol.

Burgutingman, sening soringman,  
Yagonangman, vafodoringman.  
Mening sevgim asraydi seni,  
Balogardonman, tumoringman.

Dilda yaxshi xayol, yaxshi o‘y,  
Baxt quyoshdek ko‘rsatmoqda ro‘y.  
Sening sevging bilan tog‘ bo‘ldim,  
Kel, jonginam, ko‘ksimga bosh qo‘y.



\* \* \*

Ey, voh!  
Mening dilimni  
Anglamading hech-hech.  
So'ramagin ko'ngrimni,  
Endi mendan kech-kech.

Ishq-muhabbat qudratli,  
Hech yengilmas kuch-kuch.  
Jon bersang ham sevgingni  
Jon chiqquncha quch-quch.

Erkin qushsan, osmonda  
Qanot bilan uch-uch.  
Olishma hech zamonda  
Hayot bilan o'ch-o'ch.

Sevilmasang, suymasang,  
Umring o'tar puch-puch.  
Menga ko'ngil qo'ymasang,  
Xayolimdan o'ch-o'ch!

\* \* \*

Kelishingni kutdim yana boumid,  
Jo'natarsan dedim xabar, ishora,  
Ko'ngrimni cho'ktirdi shayton – noumid,  
Yana sensiz qoldim yolg'iz, bechora.

## **TAN YARASI, DIL YARASI**

Haydovchi mashinasi bilan  
serqatnov yo'lda  
bilagimni turtib yubordi.

-Uzr, - dedi.

Bilagim og'rib,  
boshim aylanib qoldi.

Go'zal ayol poshnasi bilan  
serg'alva hayotda  
yuragimni tepib yubordi.

-Uzr, - dedi.

Yuragim og'rib,  
boshim aylanib qoldi...

## **NAJOT FARISHTASI**

Ko'nglinga bog'langan ko'ngling rishtasi,  
Najot farishtasi, ishq farishtasi.  
Hurlarning eng go'zal, eng sarishtasi –  
Najot farishtasi, ishq farishtasi.

## LOLA

Nega buncha uyalasan, Lola,  
O'pay desam qizarasan, Lola.  
Ishqing qalbimni qon qildi, Lola.  
Aytgin, qachon tuzalaman, Lola?

Lola, Lola, Lola, Lola, Lola!  
Lola, Lola, Lola, Lola, Lola!

Yonog'i ol qiz bolasan, Lola,  
Dudog'i bol qiz bolasan, Lola.  
Cho'qqilarga chopib chiqqan, Lola,  
Noziknihol qiz bolasan, Lola!

Lola, Lola, Lola, Lola, Lola!  
Lola, Lola, Lola, Lola, Lola!

## MUNDARIJA

Ustoz mehri.....	3
Quyosh.....	5
Toshkent kurantlari.....	6
Majnuntol.....	8
Qashqadaryo.....	9
Orzular favvorasi.....	11
Paxta guli.....	12
Sho'robsoy.....	14
Bobilqand.....	17
Bozortepa.....	18
Yoz.....	19
“Havodan olacha to'qiydi...”.....	20
Oshi halol.....	21
Polvon.....	22
El egasi er yigit.....	23
Da'vat.....	24
Go'zal dunyo, tuzal, dunyo!.....	25
Xabar.....	27
Muxbir.....	29
Nurli qalam.....	31
Aqchako'l.....	33
Murodboy og'aga.....	34
Ayol.....	35
Turong'il va shamol.....	36
Kema.....	37
Jonim bolam.....	38
Varrak.....	39
O'g'il suyish.....	40
Izla meni.....	41
So'nggi qo'ng'iroq.....	42

Yurak.....	44
Muhabbat.....	45
“Ko'kraginga mushtlaydi birov...”.....	46
Darvish.....	47
“Yolg'iz senga...”.....	48
Yor kelar yo'lga qarab.....	49
“Yiqildim...”.....	52
Ruhimning dovushi.....	53
Muhabbat.....	55
Sevaman.....	56
Sovchi.....	57
Sog'inch va qulflog'liq eshik.....	59
Suv.....	60
Uy.....	61
O'llalla.....	62
Uchinchi zot.....	63
Shoir Chori Avaz marsiyasi.....	64
Yuzma-yuz.....	65
Bozbarak.....	66
Nilufar guldasta (turkum).....	68
Chorlov.....	68
Nilufar.....	69
Xayrlashuvdan so'ng.....	70
Ilk bo'sa.....	71
"Oqqushginam...".....	71
Qush.....	72
“Gah dedim, yor...”.....	73
“Azizam, men...”.....	73
“Jonim dedim...”.....	74
"Hijron ko'p...".....	74
“Ey gull!...”.....	75
Qor.....	75

Yana qor.....	76
"Seni sevdim, seni..." .....	76
"Bosgan qadamingga..." .....	76
"Dedim: menga sensiz..." .....	76
"Olamga nur sochar..." .....	77
"Lol etdi..." .....	77
"Oftobning yuziga..." .....	77
"Mayda qadam..." .....	77
Nola.....	78
Nonushta.....	79
"Yashirmayman, seni sevaman..." .....	80
Baxtimning javhari.....	81
"Kun bo'lmaydi tunsiz..." .....	82
Nilufar.....	82
"Ishdan so'ng..." .....	83
Muattar gul.....	84
Alla.....	85
Quyosh botayotganda.....	86
Quyoshim.....	86
Kecha.....	86
Bo'yinbog'.....	87
Sevgi sayqali.....	88
Femida.....	89
Erkalash.....	90
Guliqahqah pari.....	91
Hijron kechasi.....	92
Maktub.....	93
Nasibam.....	93
Farishtam.....	93
"Chiroyingni..." .....	93
Nay va tanbur.....	94
Duldul.....	94

Palto.....	95
Kutaman.....	96
Ohang.....	97
Mehri daryo.....	98
Yolg'iz kulba.....	99
Iltijo.....	100
Chiroq.....	101
Araz.....	102
Bahorim.....	103
Qaldirg'ochim.....	103
Zumrad.....	104
Xilqat.....	104
Meni ko'rging keladimi?.....	105
"Hayot o'zi shunday chamamda...".....	106
"Bugun mayin...".....	106
"Yor, senga...".....	106
"Qarab tursam...".....	107
"Sen bir gulsan...".....	107
"Yuragimni rom aylagan...".....	107
"Intizorman...".....	108
Ohu.....	109
"Baland qirlar...".....	110
"Men qushman...".....	110
"Seni kutdim...".....	110
Besh kunlik dunyo.....	111
"To'qsoninchi yillar daftari" dan.....	112
"Ey, voh!...".....	113
"Kelishingni kutdim...".....	113
Tan yarasi, dil yarasi.....	114
Najot farishtasi.....	114
Lola.....	115

**UO'K:** 821.512.133-1(081)

**KBK:** 83.3(50'zb)

**M 74**

**M 74 RUSTAM MUSURMON.**

**Bozbarak** [matn]. {she'rlar}/ Rustam Musurmon.

– T.: «Adabiyot» nashriyoti, 2021. – 120 b.

*Adabiy-badiiy nashr*

**Rustam MUSURMON**

**BOZBARAK**

*She'rlar*

Muharrir: *Dilrabo Mingboyeva*

Badiiy muharrir: *Farrux Ermatov*

Sahifalovchi: *Azamat Qayumov*


Musahhih: *Mansur Jumayev*

**O'ZBEKISTON YOZUVCHILAR UYUSHMASI**

**«ADABIYOT NASHRIYOTI» MCHJ**

Nashriyot litsenziyasi: AI № AA 0043. 27.01.2021.

100129, Toshkent shahri, Markaz-15. 1/90.

 (+98) 127-30-04.

Bosishga 20.08.2021-yilda ruxsat etildi:

Ofset qog'oz. Qog'oz bichimi: 70x90<sup>1/32</sup>.

Ofset bosma. Hisob-nashriyot t. 3.8.

Adadi: 2000 nusxa. Buyurtma №

“AZMIR NASHR PRINT” MCHJ bosmaxonasida chop etildi.

100200, Toshkent shahri, Adham Rahmat ko'chasi, 10-uy.